

ASO TOFI, 18 IUNI 2020

Na toe amatalia Taulumaga a le Fono Aoao Faitulafono i le itula e 6:13 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.3) 2019/2020 & Tulafono Tau Faaofi o le Faatatauina o Tupe 2020/2021.

SUI FOFOGA FETALAI: Ou te faasilasila atu ua toe amatalia nei Taulumaga o le Fono Aoao Faitulafono.

E ia te au foi le ava ou te faatalofa atu ai i le paia o le Maota i lenei vaega o le afiafi i le toe tauaofia ai o le Palemene e faaauau lana Fonotaga. Afio lau Afioga i le Palemia, le Sui Palemia ma le mamalu o le Kapeneta, ae a outou Afioga i Minisita o le Kapeneta ma Minisita Lagolago. E faapea foi lea itu o le Maota i Afioga i Taitaifono, Sui Taitaifono ma le mamalu o sui usufono uma o le Palemene.

E faatalofa atu foi i Ofisa Sili o Pulega o Matagaluega ua mafai ona tatou auai faatasi i lenei afiafi e lagolagosua i le galuega a le Palemene. Ae i ai foi le talitonuga e ia te au le agaga faaaloalo e faatalofa ai i le faafogafoga tapuai mai a le atunuu i maota ma laoa i lenei afiafi, e afua mai i mauga tetele seia oo lava i mauga iti, tapuai aua faiva o le Palemene. Ia manuia la outou tapuaiga.

E faataatiaese Taulumaga i le aoauli analeila o lo o saunoa le sui usufono mo Falelatai ma Samatau, ma ou te tapa ma le faaaloalo le Afioga i le sui usufono mamalu e tulai mai e faaauau lau saunoaga.

Afioga TAEFU LEMI: Faafetai i lau Afioga i le Fofoga Fetalai, e manatu o lea ua maea faafeiloai foi le usugafono a le Fono Faitulafono a Samoa i lenei vaega o le afiafi. E momoli le faafetai. E silafia e lau Afioga e tau amata atu se faamatalaga analeila ae taofi mai, a o lea o le a amata lelei loa se lauga a lenei itumalo. Malo faafetai mo le avanoa.

Ia, e taofi mai o matou talanoa i le tele o itu lelei o le tatou tapu o faagasolo nei, itu lelei ai pei ona matou matauina ma matou taua foi le faatinoga o tatou aoga i luga o televise ma auala televavave faapena, a ua i ai foi ma faamama

avega ia i mea fai a aiga ma nuu ma Ekalesia, fai ma se i o tatou malolo mai le tele o mea fai a nuu ma Ekalesia.

O le tulaga lea e i ai tatou maliu o aiga, ia tatou alu ai lava i lea mea. E ala ona tigaina aiga, e tigaina lava tatou ia o tatou. Ae ua manaia tele lea taotoga ua i ai ua malamalama foi le atunuu. O maliu lava ma le valaau paia a le Atua, ae ua atili ai ona faasatauro tatou aiga ma le au faifeau i tulaga faapena i le omai e fesoasoani i maliu ae ua tele ai isi gasu ma faatele mea i le aiga e faasino i ai le maliu. O le mea la lea lau Afioga i le Fofoga Fetalai, e lagolago e lenei itumalo le faiga lea pe a faaauau ai pea. Faafetai i le faatapulaaina o taimi ma faleoloa ma tulaga faapena, ia, o lo o matauina ma le totoa, o lo o lelei mea uma.

Na pau lava le matou tatalo o le faaaogaina o le malu o le Malo aua le leoina, po o le Aso Toonai ea na tea nei, o le matua tumu lava o le isi maliu na fai i le atu Aana i le matou agai mai tua o le matua tumu lava o lenei maliu na fai i ina. O le tatalo lava i le malu o le Malo, e faamoemoe atu ia te outou le leoina ma le malu o le tatou tapu o i ai nei. Ia ae talosia na asi ae e le tatou Ofisa i Afega po o Faleolo foi ia maliu ia sa fai i le tatou faaitu. A o le agaga lava ia, ia usitaia ma tausia. E tele maliu a le matou aiga sa fai i le vaitau lenei, lea e fai le tapu. Faataatia lava o le polokalame faataatia sua fia le aofai, o le faifeau ma tulaga faapena ona ta sau lea o ita e fai ata feau ae tuu i le matai e toatasi e alu e feagai ma le nuu ma le faifeau e alu ifo e fai le maliu. E tigaina lava ia aiga o tatou lava, ua tatou faamamaluina foi le Aso Sa, tele aulape tatou te faamamaluina atili ai le Aso Sa, ae ou te faamalulu atu foi i le Maota, aua tatou te mau eseese lava, tatou te talitonu uma lava ma faatuatua i le Atua, ae se i ou avatua nai isi mau ia e fesoasoani e faatupu manatu i le faamamaluina o le Aso Sa. Ou te talitonu lava ua tele le sao o le Malo i le faatauina ma le faamamaluina o le mea nei o le tatou Aso Sa o le Aso Sapati, tatou te faamamalu ai le Sapati o le Alii i le Aso Toonai, o le Sapati o le Feagaiga Tuai ma le Aso Sa o le Feagaiga Fou. Ia, o tatou lea ua manatua foi sa i ai le Faavae i le Atua Samoa i tafatafa ane o le Faavae, o lea ua tatou tuua e ave ma vaega autu o le Faavae lenei vaega e Faavae i le Atua Samoa. Tatou te pisi lava ma faaumiumi le tatou Fono i le Aso Faraile, ta loa le 12:00 malolo le Fono, aisea? Leaga tatou te faamamalu i le Sapati o le Aso Toonai. E tele le tatou sao o lea e fai i ai i le vaega lea, o lea ua tatou taofia le ava malosi ona faatau i le aso Sa, ia o lea tatou te faia e faamamalu atili ai le aso lea. E 5 aso e tatala ai le Malo i ana auaunaga masani ona malolo lea i aso e lua ae ave le tatou faamuamua ma le tatou faamamalu i le aso Sapati o le Aso Toonai ma le aso Sa e tausii e nisi foi o tatou uso le aukerisiano. Ia, ae i ai lava le agaga e lafo i Ekalesia le mamalu lea, o le mamalu o le aso Sa, lafo lava i le Ekalesia. E i ai Ekalesia e sa se afi i le aso Sa, ona pusa se afi i le aso Sa. Ia o ai la o le a fia faatau ia ia pe faatau le tautalo i le aso Sa pe afai o lea o aulape e le mafai ona pusa se umu po o se afi i le aso Sa? Ia o aulape ua leva lava ona faataoto e Ekalesia, o isi Ekalesia

i aso uma e sa le ulaula, sa le inupia, sa le taaloga o le bingo, sa le taumafa i nisi ituaiga o taumafa, sa faafiafiaga o siva ma tulaga faapena. O aulape tapena Ekalesia aua le faamamaluina atili o le... ia o Ekalesia la na e seasea ona i ai nisi i uta i le toese, e malu lelei ma maopoopo. E i ai Ekalesia o la e oo mai lava i le taimi lenei o la e fai le tapu, la e lava e fai latou tapuaiga mai le fale, o la e ave le latou faamuamua i le soifua manuia ma le soifua maloloina o tagata lotu, fai pe le o le Ekalesia lea e tatau ona tatou lolotu uma ai. E tasi le tapuaiga i le aso Sa, le manaia foi si na faiga o i ai, tasi le tapuaiga i le aso Sa. O le uiga o le upu Sapati, malolo, malolo mai galuega sa feagai ma oe i aso e 6 ua tuanai atu, malolo i le aso lona 7. O le uiga lena o le Sapati. Ia ae taatia atu i ina, e lotu le taeao, lotu le afiafi, ae ia mautinoa o i ai se malologa, leaga o le uiga lena o le upu Sapati. O le uiga foi lena o le upu aso Sa, o le aso e sa ona tatou fai ai ni feau ae fai le malologa mai feau sa fitaituga ai i le vaiaso atoa. Ia, o nai motugaafa ia e ala i le faamamaluina ma itu lelei ma itu...

FOFOGA FETALAI: Se i malie le sui usufono o saunoa se i tuu atu le avanoa i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ona e i ai le mea lea sa tulai mai analeila agai i Afioga a lo tatou Alii na fetalai ai, O ia o le Alii o le Sapati. E i ai foi la ana saunoaga, lea sa fesili ai le isi faipule e uiga la i le mataupu lea, ona na fai galuega a iesu i le aso Sa, a o galuega mo le faamaloloina, o lona uiga la o galuega alofa e mafai ona fa ii le aso Sa. O le ala la lena, mai lava i le amataga, o lea e galulue ai fomai. O lea la e mulimulitui lava la i Afioga ia a Iesu, mea ia e faasino mai i galuega o le vaai o i latou e mamai, aua o i tonu lava, o togafitiga po o vavega na fa ii e mamai, o le mea lena lea sa tuuaia ai le tatou Alii. Mo le faipule la sa fesiligia, o lena, o le ala lena e galulue ai pea fomai, e galulue ai foi leoleo mo le puipuiga o galuega lelei.

Ia, lau Afioga pei o le tali la lena, e taua tele le saunoaga a le sui usufono, aua o le taimi nei ua ou le toe faaigoaina ia Saulo, a o lea ua Paulo. Talu lava ona pasi mai le sui usufono mamalu mai le isi Aoga Faafaifeau, e ui lava ina le i faauua faafaifeau, a o le matua mamafa o le telosia lea po o le theology lea ua saunoa tonu mai lava le sui usufono, ma o lea foi la ua tali atu le Malo, sa faapea se i tali mulimuli atu ae sili le faatea atu nei i te i ua po pogia le aso ona galo atu lea o le tali, o le tali lena a le Malo, vagana lava mea ia, galuega lelei pei ona faasino mai e le tatou Alii na mafua ai ona faigaluega pea fomai faapea foi ma leoleo e leoa le filemu, o galuega lelei uma pau ia o galuega lelei o lea e mulimulitui i Afioga ia a Iesu, o le Sapati mo le tagata, ae le o le tagata mo le Sapati.

SUI FOFOGA FETALAI: Faafetai. Ou te manatu o lea ua matua manino lelei le faafofoga a le Maota aemaise le sui usufono mamalu sa fesiligia le mataupu lea i le aso analeila, o lona uiga, e le tatau ona toe tulai mai le fesili lea. Ou te tapa le sui usufono mamalu o saunoa, Falelatai.

Afioga TAEFU LEMI: Faafetai i lau Afioga i le Fofoga Fetalai, ia o tatou lava e i ai le agaga lea tatou te tapuai uma lava ma talitonu i lo tatou Atua. Ia a o le feau lava ia a le lotu, o le feau faaleagaga. E tele galuega lelei e faia e Ekalesia. Ia ae masalo a tuu vave mai se fesili po o le a se sao o Ekalesia i mea nei o atinae o le atunuu, ae a le atinaeina o le fealofaniga i totonu o le atunuu. Atinae o le filemu, atinae o le alofa, atinae o le loto faamagalo, atinae o le po mai o le isi alafau ae u i ai le isi alafau. E le faia e le lotu le upu faatiga. Afai foi e fai, sue se isi lotu e te lotu ai ma se isi failotu e te agai i ai, o la e tatala mai i le Faavae, freedom of religion, le saolotoga o tapuaiga, la e tatala mai. E voluntary le mea. E te agai lava oe ma lou loto atoa ma lou mafaufau atoa ma lou tino atoa, a o se taumafai a se faifeau po o se matai po o se isi lava faiga e faamalosi uma ai tagata e o i le falesa, ia aua ia. E lelei ona atoa o le tagata nai lo le tino ona o le popole i aulape a le tatou nuu ma mea fai faapena. Freedom of religion and freedom in every sense of the word, saolotoga ua aumai e le faavae e filifili saoloto ai le tagata i mea nei o tapuaiga.

Faafetai tele i lau Afioga i le Minisita mo le Soifua Maloloina, ua fia nei masina o tatou feagai lava ma tapenapenaga o le taunuu mai lava o le faamai. E leai se isi o toe faaluafesasi le mafaufau pe a fafano lima leaga ua matua lava tapena lau Afioga ma le Matagaluega i faasilasilaga ma faalauiloa ua tuuina mai i le atunuu. E momoli atu le faamalo ma le faafetai. O lea lava tatou te faataitai aua le taimi e taunuu mai ai le faamai, aua o tatou e lua lava mea ia e faatali i ai, o le taunuu mai o le faamai, po o le taunuu mai o le tui puipui po o le vailaau e foia ai le vailaau. Ia o le tatalo lava, se i tautuana lau afioga tatou borders i malae vaalele ma le uafu. Ta te vaai atu lava i le feoai mai o le afaigaluega a le tatou Malo, le Immigration, sikulati i le malae vaalele ma le vaega a le falemai lea e o atu i vans e ave tatou pasese e omai agai i faletalimalo, ta te nofonofo ma ota tatalo, ua faafasitepu laasaga e ao ona savalia e le vaega uma lea a uma ona tuu pasese i le hotel, o fea le mea e sosoo ai? Faleoloa? O nai aulape ia ta te manao ia manino lelei aua a tulai mai loa ua oo mai le faamai, ia e le tatau lava ona sese le mea e sosoo ai. E tatau ona mapo lelei, o talifofoga, o totigilima, o laei la e fai, e tatau lava ona malu lelei le faiga e faatino ai pe a uma ona momoli le pasese i le faletalimalo ia sauni aua le isi laasaga. Ia, e le maua ia tatou fale car wash la e maua i la atunuu, e alu atu lava le taavale tofu atoa i totonu o le car wash, fufulu atoa le taavale, e ea ae i le isi itu ua mama taunuu i le mea e taunuu i ai ona spray lea o totonu po o a faiga, o nai mafaufauga lau Afioga i le Minisita. Ae o manatu faivavale ona ia tapenapena lelei le atunuu i taimi e taunuu mai ai.

O lea tatou te faataitai ma tatou aoga uma lava i puipuiga ae a taunuu mai loa, ia, 1, 2, 3, 4, faasolo i le fasitepu, aua ne i i ai se sasi. O nai aiga uma lava ia e faigaluega e faiaiga, fai fanau e agai uma lava i ai i le afiafi pe a manava, ae o le faigata lena ona trace le faamai. A ua tele lava faamai ua mafua mai ona o mea nei o meaola po o meafafaga se i vaeane le faafofoga a le Maota ma le tapuaiga a le atunuu. O lea tatou te i le faamai lea e mafua mai foi na maua i le maketi o ia ma maua ai gata ma tulaga faapena, e i ai le swine flu sa taua foi e nisi i latou saunoaga, o le SARS, e le taitai ona uma ia faamai. E taunuu mai foi ia faamai ua leva lava ona pole tatou e faamai sa aumai e le namu ma le ligo ma tulaga faapena. O le itu lelei lava o le tatou atunuu ona e soifua tumama tagata, e mama fale, e mama tafafale ma afioaga ma le siosiomaga o soifua ma ola ai. O le tulaga lea, ae o mea ia o tatou mea fafaga ma tulaga faapena, ua tatau nei... lea na malie i saunoaga a nisi ua tatau nei ona faalalo ae tatou amata lemu, se tuu i pa, o la e lava e taaloa meaituaolo a isi afioaga, ae avatu foi i ai le tatalo i le matou Komiti faufautua foi lenei a le siosiomaga pe a fai le Fono, ou te tatalo lava i ai, ua tatau nei ona tausolomua le Komiti ia tausolomua foi le Maota nei ina ia tuupa mea fafaga a tatou aiga ma nuu, ia faapena ona... o foafoaga na faia e le Atua i tagata soifua ma manu vaefa ma meaola uma, ae eseese le siosiomaga na fai e ola ai. Ae afai o lea tatou te ola faatasi ma fialia foi tatou fanau e sii mai le tamai maile vaeane le afiafi. Ia o isi faamai moa i tulaga faapena, e ua falo isi moa vaeane le afiafi, a o moa aupito sili lava na ona tuai ona o i le faiaiga pe lalata foi, e taamilo atu lava o la e tutu ta te vaai atu i le isi taimi ua sii mai e le tamaitiiti a o la e faaletonu le moa lea o la e i ai le faamai. Se ta te tatalo atu lava faapena, tautuana ma le tatou Maota, ua le o toe malu nei meaola pe a outou soifua faatasi tatou ma nai mea fafaga ma nai meaola nei e ao ona tatou puipui i ai. Ia, ua faapena foi si o tatou atunuu, si tamai atunuu lava. A tatou fua atu i manulele ma manufetolofi ma manu vaefa e maua i o tatou laufanua, e le o se mea tele, ae i ai lava isi e fialia e fanafana lupe, fanafana pea ma tulaga faapena, ia e le o toe tele ni mea o totoe. Ia e i ai upu a le atunuu fai mai e lele le lulu ae valoia e iao. Se amuia se nuu o maua ai se iao. Pe alo foi e tamaiti le fautasi ma faaigoa o le segavao, ou te talitonu e le i vaai na tamaiti i lena manu. Amuia se nuu o maua ai lava e oo mai i lenei taimi le faauli mai o le mamafa o le a to timuga, ua faalogoina le mea o le tiotala ae ta te le o toe vaai i ai. Ae amuia nisi o vaai i nai na manu. Ia, e i ai faasao e taumafai foi e isi itutino o le Malo e tau faasao le manumea, a o le manumea e foliga tutusa lelei lava ma le lupe, ae tataa faatasi foi i le vaomatua. A fana le lupe ae pau mai o le manumea, ia o le matua le toe maua i Samoa ia tulaga, faamolemole se i fai ane i ai se fua a le tatou Malo aemaise foi o le tatou Maota nei ina ia puipui nai nei meaola po o faasao ua faia nei. O nei manu ua taumafai i ai le faasao, ia na o Samoa lava e maua ai, a o lea ua tauau ina mou atu, a o tatou lava lea e tausolomua i le aveesea.

Lau Afioga i le Minisita o Aoga, e momoli le faafetai i le tatou one government grant, ia e momoli foi le faafetai i le tatou Malo. Ia manatua o lenei faiga sa fesoasoani mai ai Niu Sila ma nai isi atunuu, a o lea ua tauave lava e tatou le grant lea, ua faatupe lava e tatou, o tatou seleni lea ua faatupe ai. O le tatalo lava i lau Afioga, ua tataua ona aputiputi ma mautinoa o lelei ma malu lelei le faatinoga o le process ina ia mautinoa o lo o malu nai ia seleni ma faaaogatatau ma agai i le mea e tataua ona faaaoga i ai. O nai seleni e tataua ona malu ma lipoti foi i le tatou Malo le faiga e fai ai. Ia ta te tatalo lava ita o la e i ai le tatou au suetusi ma latou e faatinoa. A faatau le photocopy ma masini taugata faapena e 3 quotes ona faatoa filifili ai lea, fai le tatou ordinance ma sailia faalelei le va o le pule, o le ofisa o aoga latou te faatautaia le school grant ma supplier, ia mautinoa o lo o malu lelei nai ia vaega. O lata ita lea tatalo ina ia mautinoa o alu tataua ma faaaoga lelei seleni a le tatou Malo, o tatou lava seleni o lo o faamatuu atu aua le faatupeina o le vaega lea.

Ou te fia faafetai i nai komiti o aoga uma lava i Samoa i la outou fita faafogafoga ua leva foi ona tautua i nai itumalo ma nuu e auala i mea nei o komiti aoga. E momoli atu le faamalo ma le faafetai, e auau lava maa ae taumafai lava ina ia mausali aoga a nai fanau. O le tatalo foi i le tatou komiti, e i ai le tatou tamai seleni lea e \$10, \$20 e taua o le resitala, building fund po o le school fund po o le a lava le tauga aua ua le toe i ai ni pili, ia tautuana se i fai ai le tatou faamaoni ma faaaoga tataua na seleni ma fai foi le tatou lipoti. O le tatalo foi i nai afioaga, aua e feoloolo lava komiti aoga a primary school leaga o la e i totonu o afioaga, a o kolisi a itumalo, e le o iloa mai e le nuu le latou sui lea e i le komiti. A o le tatalo, ia aumai sui e aoga mo le komiti, e aoga mo le komiti. O le sootaga lava a tatou le komiti ma le Matagaluega o Aoga, o la e i ai le pule aoga, o le tatou lena sootaga. Na ta faalogo atu foi ua vili isi po o fea ua fai i ai le school grant. Ia, tapuai pea tatou le komiti o la e i ai le tatou pule aoga tatou te faamoemoe i ai, o le tatou fesootaiga lena ma le Matagaluega i le faatinoina o le school grants. Si tamai 10% lava lena e i le utilities, mea o repairs. Ua leva tele ona ota i ai i nei mea o komiti, ia, e sili lava ona lava le silafia o le Pule Aoga ma faiaoga i mea o minor repairs, nai lo ita lea i le komiti. O le mea la lea e faamalo atu ai foi i nai komiti ma tatalo atu ai foi, e leai lava se isi e lava le silafia i mea e fia faaleleia o aoga nai lo le pule aoga. Faia a tatou fono i kuata taitasi ma faaleleia ai ia vaega o le auaunaga.

Ia lau Afioga i le Minisita o Galuega, e momoli atu le faafetai tele e tusa ai o le auala na taua e lou uso a faipule mai Lefaga ma Faleaseela i luga o le auala i Mafafa e agai atu ai i Faleaseela, faafetai tele lava mo le auala lea lea ua faaleleia. Na e saunoa a maea loa le auala lea ua teuteu mai le aualtele o le Malo agai mai i le uafu, ia ou te tatalo faifaipea, leaga o le vaega lea o le atunuu e vailaloea, e amata atu lava i i i Mulifanua e tau i Falelatai, e vailaloea, e sami tai ae taufusi uta. E i ai lava la taimi e alu alu lava ota alu atu i le

auala ua pu mai le ogatotonu o le auala leaga foi e oo le faavae o le auala, e oo, lea foi e fesopoai ai le sami ma le taufusi. Ia ua tatalo lava i lau Afioga se i tautua fai lelei lea vaega o le auala ma se i fa ii se faiga e mautu ma mausali ai le faatinoga. E tele lava ina tatou agai atu i le itu lea i sasae, ia atonu o le tele o atinae a le Malo o la e i ai, o le malae vaalele, le uafu ma tulaga faapena, masalo e uma ae lava le Paeaiga e le i oo atu lava le isi Minisita i o matou itumalo. Vaai foi o tagata soifua foi la e i o i le la itu o le motu, afifio atu tatou talanoa ai ma se i outou silasila i le tulaga o i ai foi nai ia vaega o le motu.

Lau Afioga i le Minisita, o le auala sima i le va o Matanofu ma Falevai, ua pala lava si auala lea. Ua uma ona ou faailoa uma i lau Afioga auala galue uma lava i totonu o lo matou itumalo. Ia ou te tatalo foi i lau Afioga ia faaleleia auala galue, e 15 auala galue i lou itumalo, e 4 auala ua fai. O le tatalo lava ia ia oo lau faasoa, ae ta te le tagisa ta te iloa foi le taufaasoasoa. Ae o lata tatalo i lau Afioga, se i teu le tatou auala, ua ta le iloa foi po o le a se isi faaupuga e sili atu nai lo le... o lea lava e faatauanau le lagolago ma le talia mai e lau Afioga o le tatalo atu, e teuteu tatou auala, e le o se tupe tele e alu ai, a ia oo le taavale i le mea la e galue ai le toeaina ma le aumaga. O le mea nei e o atu afa le auala paka i ina le taavale ae faaauau le savaliga i uta i le mea o lo o galulue ai. O le tatalo lea i lau Afioga i le Minisita ia alofagia ia vaega o le auaunaga.

SUI FOFOGA FETALAI: Toe lua minute o le sui usufono.

Afioga TAEFU LEMI: O gauta ae o le mea o lo o matou galulue ai i Falelatai, matou te tuaoi ma nai uso foi i Satapuala, Faleatiu ma *Vailuutai*. O matou i luga o le mauga, e galulue mai latou i le isi itu ae matou galulue atu i le isi itu. O le tatalo i lau Afioga, e i ai auala – toe lava o le fesootai o auala galue i uta, ia ae fai lelei o lea lava e tele ina tatou agai e faaleleia auala e fesulufai ai le atunuu i taimi o mala faalenatura. O le tatalo lea i lau Afioga, faaoga nai ia avanoa e faafaigofie ai foi femalagaaiga a le atunuu. O le auala lea pei ona ou taua.

O tatou road maintenance, o lau tatalo, e lelei ona silafia e itumalo le konekarate la e teua le auala. Ou te naunau lava ou te fia iloa, leaga e ese lava le kamupani e ana ese foi tagata faigaluega ta te alu atu o la e tutu mai. E le o lava foi lo latou silafia, ae ta te fia talanoa ma fai atu i ai se tala, ae manaia le more transparent i le faatinoga o ia vaega o le galuega.

Lau Afioga i le Minisita mo Faamasinoga, aua e te ita pe toatamai foi lau Afioga, o nai mea laiti lava sa tatalo muamua ai foi i le susuga i le Resitala sa i ai, a o lea lava ta te matauina e tulai mai pea. O le Faamasinoga ua uma o Fanua ma Suafa, ua tatou malamalama lelei e fia aso ona muta lea o le apili. A uma la aso ia ua leai se apili ona mafanafana lava lea o le agaga ua leai se apili ua mautu le faaiuga a le faamasinoga sa i ai. Peitai e le o lea le

tulaga lea e i ai, po o afea lava e alu atu ai le apili i totonu, e faatino lava e le Matagaluega le tusi i tua i Faamasino ma faailoa i ai le apili ma fai i ai e tali mai. Ia e lelei lava la pe a fai e le i oo i le aso e faamuta ai le apili, ae a faapea e fai le tulaga lea a ua matua pasi mamao le aso na faamuta ai apili, e lagona le faanoanoa, aua e le puupuu le taimi na tapena ai itu o le faamasinoga.

SUI FOFOGA FETALAI: Malie le sui usufono o lo o saunoa o Falelatai, se i tuu atu lava le avanoa lea i le Afioga i le Minisita mo Faamasinoga.

Afioga Hon Faaolesa Katopau T. Ainuu (Minisita mo Faamasinoga ma Pulega tau Faamasinoga): Lau Afioga i le Fofoga Fetalai, o le tulaga lea o apili, ua uma ona faatulagaina faaetulafono i lalo o le Vaega 81 o le Tulafono o Fanua ma Suafa 1981, la e faatulaga ai aso e tataua ona apili ai, e le toe agavaa lava se isi talosaga i tua atu o le aso lea. Ae i ai foi le faaopoopoga o aso, ae talosaga i totonu o aso ia e 21, e i ai la le faaopoopoga e mafai ona tuuina atu le avanoa i lau itu faamasinoga e mafai ona faaopoopo ai le isi masina atoa e faila ai lau talosaga apili, ae le mafai ona tuuloa e le Famasinoga, o la e faaetulafono. E leai foi se malosiaga o le Tulafono e tatala ai i tua le aso ua faatapulaa mai totonu o le Tulafono. Ma le faaaloalo.

SUI FOFOGA FETALAI: Pe ua manino le sui usufono mamalu? Ia faafetai i lau Afioga i le Minisita. Se i faamaea mai lou taimi le sui usufono mamalu.

Afioga TAEFU LEMI: Faafetai i lau Afioga i le Minisita. E tutusa lelei le saunoaga a lau Afioga ma se iloa o lea ou te nofo ma au, a o lea ua ou fai atu, e le o lea le tulaga o la e i ai. E lelei la ona faamuta ai i se talanoa ae silasila i ai lau Afioga ma le Matagaluega o loo tusi atu pea le ofisa i itu faamasino e tali mai i apili, a o la e siaki atu le aso ua tea aso e tataua ona apili ai. E oo foi i le lua masina o le extension lea e toe tuu mai, ua uma foi, a o lea lava e tusi atu le ofisa. Se i taatia atu pea faapena.

Lau Afioga i le Fofoga Fetalai ou te fia faafetaia le Minisita o Faalapotopotoga a le Malo, le SLC ona o lea o lo o faamanino mai le lisi o lo o lisi ai le kolisi o Aana Alofi Nu.2, e leai o la e alu lava i le kolisi le latou lisi, ua faapena foi ona faamanino ai, e leai e ese le lisi a le afioaga o Apolima e pei ona i ai se faaluafesasi, ese foi le lisi a le kolisi ia. Ia o lea ua faamanino mai le tulaga lea, o le faafetai lea, e tatalo foi i le tatou afioaga i Apolima, le afioaga e susu ai Sa Sau ma Tooa ma le Usoalii, e alaalatai ai Sa Sauma, ia se i alofagia e malu le tatou kolisi ona o le tatou nuu. Outou ia e taumalae, e tele le itumalo, ae taumafai atu le tatou kolisi, o outou e taumalae e malu ia te outou tatou faleaoga ma malae, o tamaiti aoga ma faiaoga.

SUI FOFOGA FETALAI: E faamanatu atu i le sui usufono ua maea lou taimi, ae tuu atu le avanoa e oo ai i lou itumalo. Manatua foi e i ai avanoa taitasi mulimuli ane e maua ai lou avanoa e 15 minute, o lea ua 40 ou minute.

Afioga TAEFU LEMI: Faafetai i lau Afioga i le Fofoga Fetalai, ua lava ia ia tala, e tele foi manatu faaalua, e ava foi i le Afioga i le Fofoga Fetalai ma le tau faatoatoaina o le galuega ma tulaga faapena. E momoli le faafetai i le tatou Maota, e tusa ai o le tatou usugafono faaumiumi. Ia manuteleina lenei afiafi ma le faafofogaaga a Samoa, lou itumalo i la outou faafofoga mai, o lo o manuia lava la outou sui usufono. E i ai foi se taimi tatou feiloai, aua le popole e tele lava aso o totoe, e tapena ai le faamoemoe. Tapena pea nai uso o la ua tapena, aua foi tatou te faalavelaveina. A i ai lava le taimi e o atu ai ia sui ia, o la e toa lelei ia ma saofai lelei i le Nofoa, ia tatou feiloai lea i se taimi. Manuteleina lau faafofogaaga le paia e o lou itumalo o Falelatai ma Samatau, manuteleina le Fono a le atunuu. Manuia lau Afioga i le Fofoga Fetalai.

SUI FOFOGA FETALAI: Faafetai. O le afioga tutasi aua le finagalo o le itumalo Falelatai ma Samatau. E i ai le manatu ua ligoligo a pualele nai vaega, i le saunoaga matagofie ma fautuaga. Aemaise foi tulaga i mea i isi ituaiga. Ua manino foi auofala i le faafofoga a le Maota, faafetai tele mo fautauga, taoto laia i le Malo, o lo o i ai le faasoa lelei aua le faamoemoe o si o ta itumalo. Ua tapa lau susuga Seiuli. Le sui usufono mamalu mai Sagaga le Usoga.

Susuga SEIULI UELIGITONE SEIULI (Sagaga le Usoga): Sagaga Nu 2 lau Afioga. O lea ua suia ia Sagaga Nu 2. Faafetai i lau Afioga i le Fofoga Fetalai mo le avanoa. O lea ua uma ona fai le ma faatau ma Saleaula lea ua aumai le avanoa ou te muamua ai, ona sosoo atu ai lea ma Saleaula. E muamua ona ou faatalofa atu i le paia o le Maota nei, o le Maota o le faautugatagi a Samoa. O le Maota e teu ai le tofa, le auafamau ma moegalalo e sii ai Samoa i ona upu fai, i luma o le Atua aua se manuia o Samoa. Faatalofa atu i lau Afioga i le Palemia ma lau Kapeneta, faapea foi sui a Minisita. E faatalofa atu foi i le vaega o lo o latou agaia le Malo, paia i Taitaifono ma Sui Taitaifono, ma le mamalu i sui usufono o le Maota nei. E faatalofa atu foi, i Ofisa Sili o Pulega o Matagaluega ma Faalapotopotoga, o lo o lima ma vae i ai le Malo aua se manuia o Samoa. E fia faatalofa atu foi i lau Afioga i le Failautusi o le Fono aoao Faitulafono ma le Sui Failautusi, faapea le paia ma le mamalu o le Ofisa o lo o tautuaina le mamalu o le Palemene. Ou te fia faatalofa atu foi i le faafofogaaga a Samoa. E talitonu Samoa o oe o le atunuu mamalu, o oe o le atunuu tofi, ae le o se atunuu tali ola. E leai se vave na te toe toese pe na te toe faaopopo ou mamalu ma ou paia. O ou paia mai le amataga e oo mai i lenei aso. Lau Afioga i le Fofoga

Fetalai, e i ai le manatu, e ao ona ou oo atu i lou itumalo o Sagaga Nu 2. O lo o faafofoga taputapu mai aua e le galo lava afia i si ona vao. Le fale 3 o lou itumalo i Tuanai, Afega ma Maluu. Lou nuu o Tuanai i afio o Saena ma le aiga sa Saena. Susu Luafetasaga o le alo o fuatino, afio Tuitea na tofia papa. Lau fetalai Tupai le fale ma le afu o le Alataua. Ae faapea foi si ou nuu o Afega, le afio o le aiga Sagauifaleai, lo oulua toa lua Fata ma Maulolo, o tuitui o le Gatoaitete, le vagana i tulafale ma upu ia te oe Tuisamau. Si ou nuu o Malie, i le susu ai o le susu ai le tapaau faasisina, i le susu ai o Malietoa, e susu i lona nofoa vaevaeloloa i lona fala folaloea i lona tala na atoa, a malele ua faafofoga i ai Samoa. Afio Maualaivao ma le matua ia Faamausili, susu Seiuli o le umi na tau lata i le toa fitu ma Auimatagi. Susu Taito o le fuialii ma le aiga sa Maualaivao. Le mamalu tele i pou e fitu o le Maota o Malietoa, ma lau fetalai Auimatagi, le alo o Lelu ma Salepo, le uepega o fetalai i le lauti na laulelei. Ua manuia faiva o la outou auauna, aua o lau tapuaiga e pei o le patipati taoto a le Feepo. Lau Afioga i le Fofoga Fetalai, e le umi se lauga.

Ona ou oo mai ai lea i le Tala o le tupe, silasila le Maota nei i le Tala o le tupe, e 25 vaega 2 o le fesoasonai mama o lo o aumai i le Tala o le tupe. O le a ou le ootoo atu le tele o nei fesoasoani ae na o sina faaopoopo atu ma le faafetai i le Afioga i le Minisita o tupe o lenei fuafuaga. O le tului o saofaga i le NPF, e \$35 miliona lea ua fuafuaina mo le tausaga faale-tupe lenei, o le a faamoemoe e amatalia ia Iulai. Mo le silafia e le mamalu o le Palemene nei, o lo o faatalitali mai le tele o le afaigaluega a le Malo, o Kamupani o Faalapotopotoga foi i lenei fesoasoani taua, aua le tele o mea foi o lo o manaomia i lenei vaitau o le soifuaga. Malo faafetai i le Minisita o tupe mo lea fuafuaga tele. E pei ona saunoa nisi o lenei Maota, e momoli ai le faafetai i le penisione a le aumatutua lea ua toe faaopoopo le \$160 mai le \$145 lea sa i ai. O se faafiafiaga foi lea i tama ma tina matutua ua i ai. E pei foi ona aumai nisi o Tulafono foi i le la itu, e faaauau pea penisione mo e e malaga atu i vaa i motu e 2 o Upolu ma Savaii. Ae ou te valuvalusia aa o le fau i le afioga i le Minisita o tupe, le NPF, e a pe a tuu atu i ai ma si o matou nuu lea o Manono. O lea e femalagaai nai tina ma nai tama i vaa ia, e o atu e feoai i le va lea o Manono ma Apolima i Upolu. Ia tuu atu i ai ma nai tama penisione ia ma nai tina penisione ia i le scheme lea a le aumatutua lea, o lea e maua na o le va lea o Salelologa ma Mulifanua o lo o i ai le faamoemoe lea, ae tuu atu i ai ma si o matou motu o Manono ma Apolima i le faamaoniaga lea, ua manaia tele lau Afioga i le Minisita.

Ona ou oo mai lea, i le fesoasoani lea ua siitia nei i mea tau fale lea e i ai le polokalame lea o le ADRA. E momoli le faafetai tele i le Minisita mo le polokalame lea. O i lea sa matauina i le taimi o le faamai o le misela, e pei o i lea na maua ai le tele o le faamai lea o le misela, ona o aiga limavaivai. Ae mafai ona fausia ni o latou maota lelei e afifio ai ma alala ai. malo faafetai

mo le fesoasoani lea ua toe tuuina atu mo nai aiga limavaivi, e ala atu lea i le galulue faatasi lea o le faalapopotogota lea o le ADRA. Faafetai mo.....

SUI FOFOGA FETALAI: Malie le sui usufono mo Sagaga, se i tuu atu lava le avanoa po o le a le mea lea e fia saunoa i ai le sui usufono lea.

Afioga Fuimaono Teo Samuelu Teo: O le vaega ma le talosaga a le sui Minisita i Felauaiga, o lea pei e foliga e tatalo, o la la te feagai ma lana Minisita e feagai tonu lava ma felauaiga, ae o lea e pei e foliga e tatalo mai i totonu o le Maota, ae sa tatau ona la talanoa ma lana Minisita. Tuu i ai le tatalo, aua o lea e pei e foliga o le a oo le pule i vaa fagota o tagata taitoatasi lea e felauaia le mamalu. O Manono ma Apolima, ma le agaga faaaloalo. E pei foi na le, e le o fesootai lelei le Minisita ma lana sui Minisita.

SUI FOFOGA FETALAI: Se i saunoa mai le Minsita.

Susuga Hon Papaliitele Niko Lee Hang: E le o maua mai e le sui usufono le lauga a le sui mamalu. O le talosaga agai i le NPF ona o latou lea e vaaia le penisione. A o mea ia o pasese, se i o ma talanoa maua ia i maua vaa pe faapefea ona fai. A o penisione lea e sao lau saunoaga, na o Upolu ma Savaii, ae ona o lea e tatalo lou uso a faipule, mo se avanoa foi mo Manono. O lea le ave le talosaga i le NPF pe talia la Manono i le scheme lea.

SUI FOFOGA FETALAI: Vaai la o lea ua manino auofala ina ua saunoa le Minisita. Manatua foi le sui mamalu, e ese lava mea i tua ese mea i le Maota lenei. O la e faafofoga le itumalo. Faaauau le saunoaga a le sui mamalu.

Afioga Fuimaono Teo Samuelu Teo: Lau Afioga i le Fofoga Fetalai, o se mea e fia malamalama lau Afioga. A manuia mai le talosaga lea i le NPF, ua aumai le faamanuiaga lea, e le mafai ona feoai, ona o mai lava feofeai ma penisione ia e feoai ai, ae leai ni vaa e feoai ai ma le faaaloalo.

SUI FOFOGA FETALAI: E lelei o lea ua faafofoga atu le sui usufono, se mea e fia faasao po o se mea e fia faamalamalama, e tatau ona faailoa muamua i le Nofoa.

Susuga Mulipola Leiataua Laki: E fesoasoani atu i le faamalamalaina o le mataupu, leaga o lea e taua nuu o lenei itumalo. O lea e saunoa le tootoo i le mataupu lautele, e le faapea o se mea e fai musumususu na o laua ma lana Minisita, o lea e talanoa lautele i mea e manuia ai le atunuu. O lea foi la ou te lagolagoina le tootoo, e tatau foi la ona maua se manuia mo Manono i lea

vaega pe a lea e faapea, o lea o le a pule e le vaega lea o uafu ma vaa i le matou nuu.

SUI FOFOGA FETALAI: Faafetai i le aiga i le tai.

Susuga Hon Papaliitele Niko Lee Hang: O lea ou te malamalama o le au penisione, o tatou uma lava po o fea e te alala ai, po o Manono, a maua loa lau card lea o le penisione, o lea foi o le a tapena le uafu mo Manono, atonu o le a i ai ni vaa. Ae o la lava e i ai vaa la e feoi mo Manono, e tele ina o fua ai le aumatutua aua e le tatau ona feoi e tofogi ni pasese. E pei e toe faamalamalama atu le tulaga lea, ae pei ona saunoa le sui lea na maea atu nei, o mea faapea e aafia ai le mamalu o le atunuu. O le au penisione uma lava, afai loa e taunuu i lou 65 tausaga o lou soifua ona o atu lea o le NPF, o lau card lea e te fealuai fua ai i le vaa ma tala au fualaau maua fua. O le tulaga lea e taofia ai le feoai o penisione i le taimi lenei, o le faatonuga ma le fautuaga mai le NEOC, e le o taofia le kamupani vaa le faamanuiaga lea, masalo o se taimi o lata mai, aumai se fautuaga a le Komiti lea e puipuia le aafia o tatou i le faamai. Ona toe tatala foi lea o le avanoa e o ai toeaiina ma loomatutua i luga o vaa, faaoga ai latou penisione. Mo le taimi nei o lea e taofia ona o le tatou lockdown. Ma lou faaaloalo lava.

SUI FOFOGA FETALAI: E manatua foi o le saunoaga lava a le Malo e faamanino se mataupu, o le tali lenei mo i tatou. O lea, malie sui mamalu o fia saunoa i le Mataupu lea, ou te manatu o lea ua matua malamalama ma manino mea uma. Se i tulai mai le Minisita o le tupe.

Afioga Hon Sili Epa Tuiofi: Lau Afioga i le Fofoga Fetalai. Talu ai o au o le Minisita o le NPF, o faiga faavae o lo o i ai nei i penisione, na o Salelologa i le va o Upolu ma Savaii. Ae o lea tatou te faatasi ai le Ofisa Sili o le NPF ma le Taitaifono, o la ua fautua i ai, e o e toe fai se iloiloga, ona fautua mai lea i se isi taimi. Pe tatau ona tatala atu le tulaga lea o le feoi fua foi o penisione o tama ma tina matutua i le va o Manono tai ma Manono uta, ia faapena foi i Manono uta ma Apolima. Atonu o se mea se i toe autilotilo foi i ai, ona fai mai lea o se fautuaga ona toe tuu lea i totonu o le Tala o le tupe po o se faamama avega o sosoo ai. Ma le faaaloalo lava.

SUI FOFOGA FETALAI: O lenei ua faafofoga le Maota i le saunoaga a le Minisita o tupe, ia o le agaga lenei. Ia ae manatua foi lau afioga i le Minisita, o le vaa lava o le vaa. E tutusa lava le va o, aua e toatele foi le aumatutua i Manono ia ma Apolima, ae o lenei ua saunoa lau Afioga o la e faafofoga mai le Ofisa Sili o le NPF, se i vavae ona fai le mea lea. Leaga o lea e tapisa le Maota i le mataupu lea, e tutusa lava o le 65 o le 65 lava. Pe

Manono pe Apolima pe Savaii o lena lava. Ae faaauau le saunoaga a Sagaga Nu 2.

SUI FOFOGA FETALAI: Se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E i ai si mea lea e le i oo i ai le faatofalaiga. O le Koviti lea e aafia ai le lalolagi, e pei e fiafia tele i le vaega lea o le tai 65 agai i luga. Ae se i....pe lelei le faamai, ona toe tilotilo lea..... aua o le agaga atoa o le taofia o le mea lea, o le fautua atu i le tai 65, e lelei ona aua le toaaga e feoi, ae nonofo lelei filemu, ne i te i ua oso mai se faaletonu ona muamua lea malaga tatou. Ae se i onosai pea i le taimi lenei, a uma loa le, ua maua se togafiti ona fetau foi lea ma le toe iloilo, o le mataupu lea e laga mai e le sui usufono o Manono.

SUI FOFOGA FETALAI: Tapa le sui mamalu o Samoa e faaauau le saunoaga, faafofoga lou itumalo i Sagaga Nu 2.

Susuga SEIULI UELIGITONE SEIULI: Lau Afioga i le Fofoga Fetalai, aua le toe faauilavea mai, toetititi lava uma ma au minute. O lea ua faamalamalama atu i le sui lea na faauilavea mai, o lea ua faamalamama atu e lau Minisita, e le pule ai maua i le penisione e pei ona ou talosaga ai i le Minisita lea o le NPF, ina ia alofagia, o la e totogi pasese o tina ma tama matutua lea e malaga mai i le vaa i Manono uta i Manono tai, faapea foi Apolima. O lea foi o le a fai le uafu i Manono uta, tuu atu ma nisi vaa lapopoa ua atili ai ona toatele e faimalaga i le va lea o Manono. O lea e talosaga atu ai ina ia alofagia foi lea itu o le motu, malo faafetai. Pau lea o vaega o le fesoasoani mama lea ua ou manatuaina i lenei taimi, mo faamanuiaga ia, ae faafetai tele i le faalapotopotoga a le Malo, pei o le fesoasoani lea e manaomia i aso uma, e pei ona i ai le vai ma le eletise lea ua i ai le faamama avega e alu atu i le taimi lea e tau ia Tesema. Ua tele le faamama avega lea mo le atunuu o Samoa aua o mea ia e manaomia i aso uma o le eletise ma le vai, e momoli le faafetai tele i faalapotopotoga ia. Aemaise o faalapotopotoga uma lava o lo o ofo mai auaunaga fesoasoani i lenei vaitau ua feagai ai Samoa ma le faamai. Ona ou oo mai lea i le Tala autu o le Tupe 2020/2021, a silasila le Maota lenei i le tala o le tupe lea, 34 le aofai o Matagaluega ma Faalapotopotoga o lea ua faamatuu i ai le seleni lea aua galuega o feagai ma i latou. O le tupe lea, e leai se Matagaluega po o se Faalapotopotoga e i lalo ifo o se miliona, e i luga atu o le miliona, o isi Matagaluega e oo i le tai \$100 miliona, i le tala o le tupe lea ua faasafua atu i Matagaluega ma faalapotopotoga uma a le Malo mo le tausaga faale-tupe 2020/2021. E momoli atu ai le faafetai tele i lau Afioga i le Minisita o tupe mo lenei tala o le tupe, malo faafetai mo le galuega i lau Afioga i le Minisita,

ae faapea foi le Ofisa Sili o Pulega o Matagaluega o tupe. Faafetai i lau faasoaso a i mea e manaomia ai le seleni, malo le silasila i le lauamanu, ae ao foi ona mataitu i le faamulioatu. Ae ua matua lagolagoina e lenei itumalo le Tala faaopoopo o le tupe 2019/2020, faapea le Tala Autu o le tupe 2020/2021.

Ae toe tasi lava si vaega lea e momoli atu ai le faafetai tele i le afioga i le Minisita o Faalapotopotoga o Fanua o le Malo Samoa. Faafetai i le Minisita o Lautafi mo le faamatuuina mai o le 120 eka mo lenei nuu, ua leva ona talosagaina foi e si ou nuu se fesoasoani i fanua o lo o i uta atu o le matou nuu. Malo faafetai o lea ua amata ona fuaina le fanua lea 120 eka ua fesoasoani mo lenei nuu, aua le tau atinaeina o faatoaga. Atonu pau lea lau Afioga i le fofoga Fetalai. E momoli atu le faafetai tele i lau Afioga i le Fofoga Fetalai, i le faatautaiga o le sa o Samoa i lenei afiafi. Maua pea le malosi mai le Atua, maua le tofa mai le Atua aua le feagai ai ma tiute i lenei afiafi. Manuia le Fonotaga a Samoa i lenei afiafi.

SUI FOFOGA FETALAI: Faamalo saunoa. Malo tapena, o saunoaga faatamalii e pau mai lava le talo matua ia e toa ai le moa. Ua faafofoga le itumalo ae faapena le Maota nei. Malo le tapena, ou te tapa lau afioga i le tama matua o lou saunoa i le avanoa ua maua. O le sui usufono mamalu mai Gagaemauga Nu 1.

Afioga Hon FAASOOTAULOA PATI TAULAPAPA (Gagaemauga Nu 2): Faafetai tele i lau Afioga i le Fofoga Fetalai, o la foi e alala mai le Afioga i le Taitai o le Malo le Afioga i le Sui Palemia, aiga Kapeneta. Ou te manatu a, a o le i oo sau faamataga i le Tala o le tupe, ou te muamua lava ona ou faamalulu atu i le Taitai o lo tatou Malo le Afioga i le Sui Palemia ma le Kapeneta aemaise sui mamalu o le tatou Fonotaga. Faapea foi Ofisa Sili o Pulega o Matagaluega e pei ona tatou i ai. Ou te manatu, ua siga le galu ua iite foi fanua alalo. O lele ua ioa le lagaali a tamfaiga aiga ma tama, tama ma o latou aiga. Na ou manatu ou te le lauga, ae peitai, ou te talitonu ua malamalama atoa, ua lava sui mamalu sa o latou faasoa i le Tala Autu o le tupe. Ae talu ai, ou te nofo ae popoe, ou te tu foi ae lilia. Ina ne i sala lau gagana, pe sala ese se finagalo i manatu faaalia i lenei Fonotaga. O lea ua ou faamalulu atu, ua ou manatu ua ou matua, ua le o tutusa foi lou malosi, o le ala lea o lou faaeteete, ma lou faaaloalo, ina ne i i ai se upu ua sala i lau tautalaga. Ae talu ai, ou te faafetai i sui mamalu uma sa o latou taumafai e lagolagoina lenei itumalo, i tulaga e pei ona i ai. Ou te manatu lava ou te le toe oo i ai sau faamatalaga i tulaga ia. Ae pau lava le mea, leaga o lo o faapena ona feaveai faamatalaga. O lea ua ou manatu ai, e tatau ona ou tu e faamalamalama le mea lea. Faafetai ia te i latou o e sa taumafai ma alolofa mai i lou itumalo, ona o Samoa ua uma ona tofi. Ua taoto ae ua o se alao. Ae ou te le manatu i ai i lea vaega. Ou te manatu lava au, o pule uma o pule

mai le Atua. O le agaga foi lea o lenei sui usufono, ua ou matua, ua le o tutusa lou malosi ua galogalo foi faamatalaga. Ae ou te faafetai atu i le Taitai o le Malo le Afioga i le sui Palemia le Kapeneta o sui mamalu. Ona o galuega lelei ua faatino i tulaga aua Samoa ma ona tagata. O lea ou te manatu ai, leaga sa i ai foi tagata na oo atu ia te au. Fai mai, e alu i le matou nuu e tetee le Tulafono, ou fai atu, ua uma ona ou oo i le Palemia, ua o foi le matou nuu i le Palemia, ua uma la lou taimi. O ai le tagata e manao ai, ae se i ou teuteu muafale pea. Ou te faaeteete i tulaga, ua leva ona ou i ai i tulaga o upufai o Malo. Ae e ia te au le tulaga ou te ava ma matau i le Afioga i le Taitai o le Malo, o a tulaga e i ai? Ia o lea ua talia lava maunu, upu a le Palemia, e toe sui foi. E i ai foi se taimi, po o le a lava le tulaga e i ai? Afai lava, o lea la ou te nofo pea, ma lou talitonuga, o fea lava le mea e oo i ai, ia atonu e sau se aso, sau se taimi.

O le ala foi lea o lou manatu ai, o lea lava e i ai le Nofoa o Saleaula. Ae pau foi le mea lea ou te popole ai, pe afai ae e le toe tu mai ia se Saleaula. O lona uiga ua leai se Nofoa o Saleaula. O le mea foi lea ou te talitonu ai, o lo o ou taumafai foi, se i o matou feutagai ma si o matou nuu, ina ia taumafai pea ia so matou Nofoa. Atonu e i ai se taimi, i ai se aso, e tusa ma le finagalo o le Atua. Ia e fai aso le Atua, a o tulaga uma, ia o lea ou te talitonu lava e le o tupu na o au. O lea e tupu uma ia tatou. Ia Tumua e tupu foi i isi itumalo ae e talitonu e pei o lou itumalo lea. E manatu leaga e le o se itumalo e avane ai o le tulaga pule, Saleaula ma Fatuvalu pule ono i Salafai.

O lea la ou te tagi uu ai lava, ma ou tatalo pea i le Atua, ia alofa mai. Atonu e i ai se aso, toe sui le finagalo o le Afioga i le Palemia, ia toe aumai lea toe faafoi mai Salamumu i si o matou nuu. E le o se mea o le a saga tuu ai pea. E le po pea se nuu. Ae o le agaga lena ia te au, ua le lava ia lou malosi, ae ou te masalo foi ou te toe sau foi.

Ou te le ata i le mea lea leaga ou te talitonu a maua lava lou malosi, ou te toe sau foi. Ou te taumafai lava ia ma faafesagai ma le Afioga i le Palemia, ia ave ave sau se aso, ia ona aumai lea o le tulaga e aloaia lelei, ae o la e o le tofi mai le Atua. E pule pea le Atua e toe tatala ia le finagalo o le Palemia, ia toe fai lea, toe faafoi si o matou nuu, leaga e le faapea e palota i inei, ae o upu a le atunuu, o le ala i le pule o le tautua. E le palota i Upolu ae amata ai na alu lea i Saleaula. E pei o mea ia e atugalua i ai le faamoemoe.

O lea ou te tatalo atu ai ma le agaga faaaloalo, ia o ai lava e i ai se agaga e alofa mai ia Saleaula ma ona tulaga taumafai, ia soia ia, taatia maia ia Saleaula, e alofa atu, leaga o Olo, leaga o le tino o le Saleaula. O le mea foi lena na ou pau ai ia Olo aua e solitulafono lava ae ou te le i avea.

O le mea lena, o au e mama tele lou loto. Ou te le i manao e ave se isi i le Tulafono. Ia, ona faauma atu ai lea o au tala i lea mea. Alolofa ia Olo ma Laauli, o lea ua ou, ou te iloa o oulua e te lua alolofa tele ia au. Ia ai o lou toeaina lea ua oulua alolofa mai ai, ae alolofa ia omai e tatou opogi si o tatou Malo, e tatou fai fai mea faatasi. E le po pea se nuu, e agalelei pea le Atua.

E alu aso sau aso, ia faapena ona i ai le agaga ola o le Atua i le Afioga i le Palemia, ina ia ola ai lona alofa i tagata, ia faapena ona toe faatulaga ai tulaga o le tatou Malo.

E pei ona pau lea o si, e i ai lava si mea sia i le Ofisa o Faamasinoga ou te fia oo i ai. E i ai lava le mea lea o faaiuga o Faamasinoga, o le mea lea e i ai le upu la le, e saina loa le Faamasino, o le tagata e na te toe suia le faaiuga, e falepuipui. Sole, a ua faafia ona aumai faamasinoga ae e toe ta sui ma toe apili mai e tagata? E pei e tau atu ai, e le faamaoni le faiga o faamasinoga ia e fai. O lea ua, e pei e pau lea o si au tuualalo i le Ofisa o Faamasinoga. O lea le uiga o lea mea o le sau o le iuga ua uma le faamasinoga, ae toe apili le faamasinoga? A la ua uma ona saina e le faamasino ua malo Lafai. E pei o se agaga lea e tuu atu ai, e pei i e le o mautinoa lelei, i faaiuga ia e fai i sainiga o tatou faamasinoga.

Ona ou oo atu ai lea i le Afioga i le Minisita o Siosiomaga. E i ai lava si mea lea, ina ne i te i ua ou le toe sau, ou te masalo a fai na ou oo atu i lau Afioga i le tolotolo la e sosoo ma lo matou lava, o lena ua poloka ai le sau o le sami i uta e omai ai i'a i le aloalo e fia a flow lava le sami a ua punitia la ua, lea foi na matou o atu ai ma lo matou nuu. Ia e talosaga atu ai ma lou faaaloalo, pe i ai lava sina seleni o totoe i lau Matagaluega se i fai ai le mea lea, atonu o le a alofa mai ai aua a fai loa mea na e mautinoa lou toe sau.

E momoli atu ai le faafetai i le Afioga i le Minisita o Galuega, ia e faafetai mo galuega faatino. Ia o mea foi ia e fia faafetai atu ai i le Afioga i le Minisita o Tupe, ia i lona faasoa limalima lelei, ona e talitonu e ui lava ina luga lalo Tala o le Tupe ia ae o lea lava e fai ia le galuega a le Malo, e momoli atu ai le agaga faafetai. E faapena i Minisita uma lava, e momoli atu le agaga faafetai, e talitonu lava e le faigofie ia la tou galuega, e pei o lau aioi atu lena i lau Afioga i le Palemia, ia o lea lava ua ou onosai lava i mea ua e fai mai, e toe fai lava. E toe fai i se taimi. Ia e le i oo i lou taimi e valaau mai ai le Atua ia oe, ia a ua fai le mea lea e toe faafoi mai ia Salamumu i Saleaula ma lou faaaloalo, ia manuia le Fono.

Susuga Hon Laauli Polataivao Leuatea: Lau Afioga i le Fofoga Fetalai, i le ava lava ma le faaaloalo, sina avanoa lava se i fai sina upu i le matua, ia Saleaula ma lou agaga faaaloalo. Ioe Faasoo...

SUI FOFOGA FETALAI: Ia o le a tuu atu le avanoa.

Susuga Hon Laauli Polataivao Leuatea: E leai lava se agaga e toe ta i utumaau, pe matou toe falolo le afaloloa, o lea ua saausi le faafofoga ma le maimoa i le tuleiga ma le saunoaga. O le tatou nofoapule o le nofoapule fealofani. O lea foi e alalatai mai Matautu, afai o le a sau silasila i le taumafai atu o Saleaula lea, ia ma le taumafai o Lavea, po o Asiata, o le moni lena o le alofa. Ae o lea ua e malele, ua foi ia so matou leo, e alofa atu, leaga e

tumu i le faaaloalo, e tumu i le faaaloalo Faasoo, e le gata o oe o se toe ulutaia o lo tatou Maota, ae o oe o le Pule Faavae.

E faalologo i ai le nofoapule. A o manumanuga na sa i ai. E le faapea o sou faataumatatao Faasoo. Na ou taumulimuli lava i le mataupu lea, ua aveese ai ma au ma le tatou Pati. Ae o le agaga lena, ua ava atu, fai lena. E le toe i ai so matou leo e ui i so matou lagona, a ua o matou manatu, fai le tofa a Saleaula. Ae alu aso e sau aso. Alofagia e le Atua ia umi lou soifua, ina ia taulu taulu tafega, taunuu i taunuuga lelei.

Faafetai Matautu, o so matou taumafai atu foi i futia ua sola ma aso ua alu, e faapena le tatou tausiga. Leaga o oe o le muaau, e malu ai lea itu i le Maota i Vaituutuu, Tupua i Vaituutuu. O alofaaga molipo na e faigata le Tupua i Finao. E le o Lavea ma Faletoi o lea e ta te tausiga, ae afai o suaga o le vaatele i le afiafi nei, o le a tai alalo ia le ia a Sa Saumani. Ma lou agaga faaaloalo.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai...

SUI FOFOGA FETALAI: Se i tulai mai ia le Taitai o le Malo.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai o lea ua saunoa ia le sui usufono o Saleaula, o faafofoga foi ia lo tatou Maota nei. E pau lava le mea ou te popole ai, o lea ua tautino mai lava e le sui usufono.

Ae a tatou oo loa i le tulaga faaleaganuu, e pau lava lea o le mea ou te popole ai o le faaoloataua. Ua uma ona pasi e le Palemene lenei le Tulafono. O lea e tatou te alu ai nei. Ua uma foi o lea ua saunoa sao ai le sui usufono o Saleaula. E pau lava le mea ou te popole ai, o le toe lote o upu i i e faali atu ai e pei e foliga mai e, o tulaga ia o lea sa tulai ai le sui usufono, e le o le tulaga lena.

O le sui usufono lea faatoa faamavae atu nei lona tootoo. E na o le pau lava le mea o lea ou te matauina, o le faaoloataua, o le mea lea sa fai. A ua uma ona fai ia le iuga a le Palemene.

Lau Afioga i le Fofoga Fetalai, ia faagasolo le tatou Fono.

SUI FOFOGA FETALAI: Ioe malie le sui usufono o tulai mai, ua ou manatu o le a...

Susuga Hon Laauli Polataivao Leuatea: Lau Afioga i le Fofoga Fetalai, e mama lava mea i e lotomama, e mama mea i e lotomama. E te silafia e sili le mea lea sa saunoa ai le Taitai o le Malo, o lona lava ia finagalo. O le agaga lena e mama au ma le mea lea o le faaoloataua.

SUI FOFOGA FETALAI: O le a faamuta le mataupu lea. Ua maea foi... Laauli, alala mai i lalo se i fai atu se tala a le Nofoa. Se i fai atu se tala a le Nofoa. O Tulafono e taitaiina ai le Maota, e le mafai ona toe saunoa se sui usufono i se mea ua uma ona pasia i le Maota lenei. Sa ou tuu atu ina le avanoa ma le manatu, ua lava lea. O lea ua oo lau upu, ua lava lea. Ae o se isi vaega o lau saunoaga, ou te faamalulu atu i le sui usufono mamalu. Ou te le talia, ona toe faailoa nisi o tulaga i tua atu. O lau faapea atu, ua lava lea. Ia gata ai lea. Ua uma ona fai le faaiuga a le Maota, tatou taoto ai faapena. Afai o le, ia se i, e i ai se mea ua tulai mai ai le sui usufono mamalu? Faleata?

Tofa Lealailepule Rimoni Aiafi: O lea ou te fia tautala, pe a tusa ai ma lou finagalo. Pe a maea lau saunoaga faamolemole.

SUI FOFOGA FETALAI: Faafetai, se i taoto mai pea le galuega a le Nofoa, se i maea lelei. E lelei ona ou toe faamanatu atu, a fai se tala a le Nofoa, o le tatou galuega e fai faatasi. E tou te lagolago mai, leaga o lea e galue le Nofoa i Tulafono Tumau o le Maota lenei. E le mafai ona tatou laa ese ai. O lea e faamalulu atu ai i le sui usufono mamalu. Lava papale mai se i maea lelei ma saausi le saunoaga a le Nofoa, ia ona tuu atu lea o le avanoa. O le mea lea e le toe tele ia se matou faamatalaga. Malo faafetai ia te oe le Matua, e tusa o le saunoaga o lo o faafofoga le itumalo faafofoga le Maota ma le atunuu, i le faafetai tele, ia faamanuia le Atua. Ia, tapa le sui usufono o Faasaleleaga Nu.3.

Afioga TOFA FOLENI LIO TAMA GALU (Faasaleleaga Nu.3.): Faafetai i lau Afioga i le Fofoga Fetalai, faafetai foi i le galuega, e pei ona feagai ma lau Afioga i lenei afiafi. Ae e muamua ona ou faafeiloai atu, e faatulou foi i le paia o le Maota, ona o le Maota o le faautugatagi o Samoa, le malae i Tiafau nei. Faatulou atu ma faafeiloai atu i le Afioga i le Taitai o le Malo, lau Susuga i le Palemia faapea foi le Sui Palemia, ia ma le mamalu o le Kapeneta.

E faafeiloai atu foi i lena Itu o le Maota, Taitaifono ma Komiti, aemaise sui usufono e pei ona i ai i lenei afiafi i le Maota o Samoa. E fia oo foi se faatulou ma faafeiloai i le tapuaiga i le Ao Mamalu o le Malo ma le masiofo, e le gata i lea o le Sui o le Fono a Sui Tofia ma le faletua. Ia tainane le Faamasino Sili, le Afioga i le Peresetene, Faamasino ma le Ofisa o Faamasinoga, ia malo le tapuai a o alofaiva le Maota o Samoa o lana Fono, e pei ona i ai,.

Ia le galo ia le tapuaiga a nofo a faafeagaiga o latou o lo o tatalo i le po ma le ao, ia aua se manuia o le Malo o Samoa, ia ae e le gata i lea, ia o se manuia foi o Samoa, ia aemaise lenei vai tau, i faafitauli ma faamai. O le mea lea e faamalo i le nofo a faafeagaiga, nofo a Ekalesia. Ia e le galo foi Samoa aoao, ia ou te talitonu o Samoa ua uma ona tofi, o le a le toe oo i ai se leo, aua o

Samoa o paia mai anamua, ia e le avea e se isi, tulou. Ia ae o lenei avanoa, ia e na o se agaga faafetai.

E momoli le agaga faafetai, i lau Afioga i le Taitai o le Malo, Susuga i le Palemia, Sui Palemia ma le Kapeneta ona o galuega e tele, e tele galuega o lo o feagai ma le tatou Malo, mai lava i le 2016 talu ona tatou pale mai, ia o lenei lava e faaalu galuega. O lea e molimau Samoa, i nei galuega o lo o feagai pea. O le mea lea e faamalo le lototetele, faafetai le onosai. Faafetai mo galuega uma. Ia e le gata i galuega i Apia nei, ia ae faapena foi i Savaii, malaevaalele ma auala o lo o faaalu pea, ia faamalo faafetai i nei galuega.

Faafetai foi mo galuega i Savaii, e pei ona i ai le auala laupapa lea i Maliolio, ia malo faafetai. E talitonu ia o le agaga lea o le Atua, ia tatou galulue, tatou galulue mo se manuia o Samoa, ia malo faafetai i lau Afioga i le Palemia. Malo lototele, malo foi lou onosai, e ui lava foi ina tele faafitauli, ia ae fai mai le upu, 'o e lava e matatau i le Atua, ia e manuia mea latou te faia'. O le mea lea faamalo faafetai, ia faafetai i le nofo a Minisita, lea e talitonu ua faafetai atu le tele o sui usufono, ia aua galuega o feagai pea ma le tele o Matagaluega. Faafetai foi i Ofisa Sili o Pulega o Matagaluega, malo le galulue, ia ae faapito lava se faafetai i lau Afioga i le Minisita o Tupe lau Afioga Sili faapea foi le Pule Sili, ma le Matagaluega o Tupe, ia aemaise o Matagaluega e fia sa galulue e faamaopopo lenei Tala o le Tupe. E talitonu o lea ua taunuu le taiala lea sa aumai, fai mai le taiala, tatou lalagaina faatasi se lumanai manuia, ma mausali mo Samoa. E ese le manaia o le taiala, ma o le taiala lea, o lea lava ua foliga mai ua taunuu, e iloa i le faasoasoa, iloa i le lufilufi lima lelei.

O le mea lea faamalo i le Matagaluega o Tupe aemaise lau Afioga i le Minisita, ia e lagona lava ia le mitamita lau Afioga Sili, o oe o le tamalii o Faasaleleaga, mai le motu tele i Salafai, malo le onosai, ia malo foi le toa, ia aua le tau faasoasoina. Ia o le agaga lea o le Atua, i e e matau i le Atua, ia o le agaga foi lea o le Atua ia manuia tagata uma e faasoa, aua o le faasoa lena, lea ua sau mai i o tatou matua, tuua se i oo lava i fanau. Ia e le gata i lea, ia o tagata e i ai ia gasegase faapitoa, o lea ua oo uma i ai le faasoa. Ia e le gata foi i lea ae o Matagaluega eseese, o le mea lea faafetai, ua moni ai le taiala, tatou lalagaina faatasi, se lumanai manuia, ma mausali mo Samoa. Ia ua tonu lava ma ua amiotonu lea taiala, o le mea lea e faamalo i lau Afioga.

Ia ma e o le Tala foi o le Tupe, e lagolagoina e lenei itumalo, le 2019/2020, 2020/2021, e matua lagolagoina le Tala o Tupe e pei ona folasia mai. Ia ae i ai ia nai manaoga laiti nei.

A o le i folasia manaoga nei, ia e pei e tasi lava ia le Minisita lea e agai i ai ia matou fautuaga ma manaoga, o le Afioga i le Minisita o Galuega Tetele. O le mea lea Papalii, faamalo, o le tele lava o talosaga, o auala galue, o taligalu, e pei o talosaga lava nei. Ia ae momoli atu ia le agaga faafetai, fai le leo e fai ma sui o lenei itumalo, Faasaleleaga Nu.3, mai i Saipipi i Siufaga, e matou te momoli atu ia le agaga faafetai i le Malo Susuga i le Palemia ma

le Kapeneta, ona o galuega tetele lea ua faaalu i itumalo. O taligalu ma auala galue, o le tala a tagata o lou itumalo, faafetai i nei galuega, e le taugofie foi, ae faafetai tele, i lau Afioga i le Minisita, lau Susuga Papalii, ia po o lau Afioga foi Unasa.

Faafetai le manatu ane, e pau lava ia o mea sa ou lauga ai i le 2016 mo lenei itumalo, o taligalu ma auala galue. O le mea moni lava, e na ona tau lava o auala galue, ae ua nofoia uma uta e tagata. O le alu i uta mai Saipipi i Siufaga, e tele tagata ua nofoia uta. Ia e le gata i faatoaga ae o galuega e oo lava i faleaoga, o Maota tapuai, o Maota o Faafeagaiga, ua lau uma i uta, ona e fai lava sina lamatia o lenei itumalo, mai le malosi o le galu.

Ia e pei lava ona outou silafia pe a outou malaga atu i Savaii i Faasaleleaga, e ese le malolosi o galue e taia ai le oneone ia ma fanua i le sami, o lenei itumalo. O le mea lea faafetai ua tali mai lo tatou Malo, ia o le agaga faafetai lea i luma o le Atua, ma luma o lenei Maota, galuega o lo o faagaioi nei. Ia e talitonu foi, o le agaga faafetai foi mo galuega i Savaii, aemaise ia le auala laupapa lea i le Maliolio. Faafetai mo lenei galuega tele. Ae pau le fautuaga, o lea la ua sao mai taavale i le Maliolio pe a tafe, ae a oo mai i i Lano, e poloka i ina taavale i le alia lena na saunoa foi le isi tasi o sui usufono. O le mea lea e manaomia lava se auala sima i Lano, tulou. A pasi foi la Lano ua manuia le omai o taavale i le Itu o Tane ma Asau, fetau foi ma le isi faafitauli i Sapapalii. O lona uiga, e moomia lava ia vaitafe nei po o alia nei, e fesoasoani i ai. Aua e leai se uiga o Maliolio, ae omai taavale poloka atu i Lano...

Susuga Hon Papaliitele Niko Lee Hang: Lau Afioga i le Fofoga Fetalai...

SUI FOFOGA FETALAI: Malie le sui o saunoa se i tulai mai ia le Minisita o Galuega se i saunoa.

Susuga Hon Papaliitele Niko Lee Hang: Faafetai mo le avanoa, ua uma ona ou taua ia le auala sima lea i Lano i le lauga lava foi i le sui usufono mamalu foi ua tuanai, o lea e sosoo lava ia Lano ma Sapapalii, fuafuaga o le tapenaga o galuega tetele. O lea ua maea Maliolio, sosoo Lano, uma Lano, oo mai i Sapapalii. E sao le saunoaga, o alavai ia e poloka ai ia le... aua pe a papa vai. Ia taatia mai la i toe lauga mai se isi. Faafetai.

SUI FOFOGA FETALAI: Ia faafetai, tulai mai le sui o Faasaleleaga, faaauau le saunoaga. Manino le saunoaga a le Minisita.

Afioga TOFA FOLENI LIO TAMA GALU: Faafetai i lau Afioga i le Minisita, ia e moni lava o lea sa e saunoa i ai, ia ae pei o le faamanatu. O vai ia i Maliolio, ma Lano ma Sapapalii, ia o le mea moni lea e a ulu tafega, ae selefutia Vaisigano.

O le vaitafe lea i uta i Patamea ma.. o lo o i ai vanu tetele, a pa mai la, e aafia tele ia le Faasaleleaga. O le mea lea, e pei o alavai ia e sau ai le tafe i le sami, o i le afioaga o Lano, ia ma le afioaga lea o Sapapalii, ia ma nisi foi o afioaga i le itu o Amoa. Ia leaga o nei aso, ua tele ina aafia i le siisii o le sami, ia ma le suavai. Ia ae faafetai, faafetai tele mom galuega lea, ia ona e taua lava ia auala laupapa nei, aua a tilitili mai ia mea o gasegase i Tuasivi ae poloka, ia tasi lena auala.

O le isi mea e moomia ai lava auala laupapa nei, ia o matou Savaii e tasi lava ia le taulaga e o i ai o Salelologa, o le uafu. A omai la nai o matou tagata i le Itu o Tane, Asau o Salega, ia e fia maua lava Salelologa i le uafu. Ia ae a poloka la i vai nei, ia ona le maua mai lea o galuega o fanau i aoga, ae faafetai i lau Afioga i le Minisita, ona oo atu lea o le isi faafetai lea, o le taulaga lea i Salelologa. Ia faafetai i le Malo, lau Afioga i le Palemia, le Sui Palemia ma le Kapeneta, o lea lava ua atinae ia Salelologa, ia faafetai i le tofa, faafetai foi o la ua amata ia le NPF, le fale lea, le Maota o le NPF, e taua tele le Maota lea o le NPF. E tua i ai matou nei i Savaii, ia aemaise ia le aumatutua.

Ia pau lava si mea lea, e i ai le malaevaalele lea i Salelologa o Maota, ia faafetai o lea foi ua gaiou ia le malaevaalele, e pau o le mea, a oo loa ina toe tatala vaalele, ia faaalu loa le malaevaalele lea i Maota. E i ai foi le isi malaevaalele i Asau, ia ae ou te iloa ua tapuni ia lena malaevaalele. E pei o nai mea na mo matou i Savaii, malaevaalele lena i Maota e manaomia lava. Aua a i ai mai gasegase tigaina, a ua le fetau ma le vaa, ia e pei la o i e toe foi ai. Ia e pei o nai talosaga na mo si o matou motu, faaopoopo i ai ma se isi vaa, e pei ona faalogo o lea o le a avatu le isi vaa mo Savaii e 2 ai vaa tetele ia pei o le Lady Samoa III aua le fealuaiga o le mamalu o le atunuu. O lea lava e matauina, semeamanu lava si vaa lea e tasi o le Lady Samoa III ma nai vaa ia o lo o lagolago i le galuega. Ia, ona faatai lea o sou leo, se i oo se faamatalaga i le matou itumalo.

Lo tatou itumalo, ia o lea ua momoli le agaga faafetai i le Malo aua galuega lelei ma galuega tetele o lo o faia e le Malo mo tatou itumalo aemaise o Samoa. O le mea lea i le paia aua le Aiga Taulagi, Toleafoa ma Vaafusuaga, Susuga i le Maopu ma Usoalii, alaalatai oe le Matua Fetalai, Segi ma le Pulealeuu, lo outou Toafa ma Tagata Matutua, faapea le Falefitu ma Tatau ma le Faleupolu o Tofiga ia Salemuliaga. Ia o paia na ma mamalu o si o tatou itumalo mai lava i le malae taotooto seia paia Siufaga. Malo i la outou tapuaiga, malo foi tatalo, e le gata i le itumalo a o faafeagaiga o lo o feagai pea ma le galuega paia, malo faafetai, malo tatalo mo le tatou Malo e pei lava ona i ai. O si mea lea ua faamanatu atu, o le tatou vavao lea e i ai nei. E momoli lava lau faafetai i le komiti, le mea lea o le NEOC. Faafetai. Na pau lava le talosaga, tatou alu ai pea i lena, leaga e moni lava e le i sau se faamai, ae le iloa e se isi lena mea. O le faamai foi lea ua aafia ai le lalolagi, ia e le iloa po o se faamanatu lea a le Atua i le lalolagi, aua fai mai le Tusi Paia, “a

oo mai faamai ma mea faigata, ona outou iloa lea ua lata mai le Alii.” Ia o le faamanatu lea mo le lalolagi ma Samoa. O lona uiga, e tatau lava ona tatou anapopogi ma tatalo i aso uma, pau lava lea o le auala. Afai ua siliga tali i seu le atamai o fomai ma saienitisi i le sueina o se vailaau ma se fofo, tasi lava le vailaau sili, anapopogi ma tatalo. Na pau lava lea, o i ina e puipui ai Samoa, puipui ai le lalolagi mai nei faamai. Ae faafetai i le Afioga i le Palemia ma le Komiti, malo foi le mataala mo puipuiga, o tulaga uma lava e lagolagoina lava tapu ua i ai nei, e oo foi i le aso Sa, o le mea taua lea i lou sui usufono, faamamalu lava le aso Sa, faamamalu le Aso Sa ina ia o uma tagata i tapuaiga e manuia ai Samoa ma o tatou aiga.

Lou itumalo, ou te iloa o le finagalo foi lea o le itumalo lea ua momoli, ae malo lava le tapuai. Faatai lea o se leo lau Afioga i le Fofoga Fetalai, faafetai mo le tauaveina o le tatou Fono i lenei po, ia manuia tele le tatou Fonousu aemaise le paia o le Palemene, faapea foi le Failautusi o le Fono ma lona Ofisa, o Ofisa Sili o Pulega o Matagaluega ma faapea foi Faalapotopotoga ma le mamalu o le Fono i lenei afiafi. Ia agalelei mai le Atua ia i ai le manuia o le Atua o se taimi foi tatou taape, ia tuliloaina e le Atua le mamalu o lenei Fono. Ma lou agaga faaaloalo. Faafetai.

SUI FOFOGA FETALAI: Ua faamalo saunoa i le sui usufono mamalu mai Faasaleleaga Nu.3, o le sui usufono mamalu foi o ia o le Aoao Fesoasoani, faafetai mo fautuaga lelei aua le agai i luma o le manuia o le atunuu.

Ia, tuu atu le avanoa e saunoa ai le sui usufono mo Faleata Sisifo po o Faleata Lona 3.

Tofa LEALAILEPULE RIMONI AIAFI (Faleata Sisifo): Faafetai mo le avanoa i lau Afioga i le Fofoga Fetalai. Ou te muai faatulou i le maota i Tiafau, le Maota Fono o Samoa e fafau ai tia o le tautiaga aua Samoa ma sona lumanai. O le Maota e lauiula ae pou i sui usufono filifilia o Samoa. O le Maota e te ulufale mai ai ma lou matau ma lou gatete aua e faavae i le papa mautu. E faavae i le papa e le liliu, e tumau mai lava i le amataga e oo i le gataaga.

Ou te faatulou i le faafofogaaga a Samoa mai lava i mauga tetele seia oo i mauga iti, le aufaigaluega tofofi a le Atua ma Samoa i ona tulaga faalupe. E faatulou i lau Afioga i le Fofoga Fetalai, lau Afioga i le Palemia, lau Afioga i le Sui Palemia ma le mamalu o le Kapeneta, Minisita Lagolago, sui usufono mamalu o le Palemene aemaise le aufaigaluega tofofi a le Malo o lo o tautuaina le tatou atunuu i aso faipea.

Fai mai e faapopo o ni aso ua a o aso folau e le tuua. E le mafai e se malosi faale-faamai, taua, fevaevaeaiga ona taofi le taimi a le Atua. Na pau lava le mea a tatou e fai o le faatonutonu o lo tatou sa po o fea e agai i ai, faamoemoe lea i le Atua nate taitaia tatou i taimi uma. Ua lamalama faaii foi lenei

Paeaiga, ia, atoa le tatou auvaa, tasi lava le tama foi na valaau i ai le Atua, a o lea e atoa lava tatou. E ui lava ina vaai atu ua sinasina lauao le toatele, ua manifi lauao o nisi, ae faafetai lava, faafetai lava tou te le maua lau style lea e i ai o le leai o se lauao ae aulelei lava, o se lauulu. Sui tofofi o Samoa e le faigofie lo ouotu tulai mai. Lou itumalo, o le a faaiu ia te outou sau faamatalaga leaga o lea ua i ai le fesuaiga pei ona i ai nei. Ae na o ni nai mea ia na ona faamanatu a i le itumalo ae ou te le i oo i le Tala o le Tupe.

Muamua, o lea ua tuuina mai le faamalosiua mai le afioga i le tamaitai pule o le LTA, o le Afioga foi lea i le Minisita, i le tatou auala lea i Falelauniu, lea sa saunoa foi le sui usufono o le Tu Taulaga, ua leva, mai lava i le Paeaiga na ta nei i le taimi o ou tauavea le tofi o Falelauniu na amata mai ai lau talosaga, ou te le i toe faipule ai lava, ae sa faaauau pea lau tatalo i le Afioga i le Minisita, leaga o au a ave le upu, e tatau lava ona mulimulitai. O lea la ua tali mai Falelauniu, o lea ua tender le tatou auala, faafetai i lau Afioga i le Minisita, le afioga i le Ofisa Sili ma le Malo. E tusa lava pe ou te le faipule ia Falelauniu, ae faafetai lava o lea ua tali, ma le auala lea e agai atu i uta i Aleisa, ia o lea ua uma ona saunoa i ai le Palemia, o nai mea na. O Faleata e le o ni nuu e tagisa tele i ni mea.

Na pau lava lea o le mea tasi lea talosaga sa fai pea, o si au aoga lea i Vaitele, sa faaiu le Paeaiga talu ai, amata le Paeaiga lenei o Vaitele Primary School, ae oo mai i le vaiaso na tea nei, ua Tafaigata Primary School. Ou te le malamalama pe faapefea ona sui mai ia Vaitele ia Tafaigata. Ae le afaina o le mea lava e tasi. Lau Afioga i le Minisita, ia, ou te le fai atu, ua tele tagata e faafetai i lau Afioga, fai faatasi ta aoga ia e lua, fai faatasi, ona ua faatupulaia le tulaga o i latou i lea vaega o le atunuu, ae faafetai foi o lea o le a faaoga i ai le falepuipui, le mea sa i ai le falepuipui, atonu o le mea lea ua talafeagai. Ae aua ne i galo ia te oe, ua leva ona ou tuitui atu i le ta aoga lea i Vaitele, o lea la ua e saunoa mai, a ua toe 6 masina o le Paeaiga, ia, faamolemole e taatia ane i ou tafatafa le mea lea e tatau ona faatino. O lea ua maea, manatua foi e fai le primary school, aua o le college, aoga maualuga, na o le tasi le college lea e aumai i ai aoga primary school ia ua fai si toatele. O lea la ua maea le hall a le matou Kolisi lea i Faleata, faamalo atu, talu ona faavae le kolisi e leai se hall, o lea ua maea e pei ona tatou i ai foi i le tatalaga i lea masina, ia faamalo faafetai.

Lau Afioga i le Minisita mo Tina ma Tamaitai, e le toe oo se faamatalaga o lea ua e saunoa i mea ia o Sui Tamaitai leaga e aoga tele i nuu ia tu taulaga aemaise matou i vaega ia, faafetai o lenei o le a fai i ai lau fuafuaga ona e moomia tele, aemaise la o lea ua faasolo mai le tulaga lea i komiti tumama, ia ou te talitonu e tele lenei tupe, ae se i vaavaai po o le komiti tumama pe tuutasi i lalo o le faamalu o le komiti a tina. O le komiti a tina o le komiti tumama foi lenei ma le tele o le fememeai ma le faigata ona faasolo o polokalame, ae afai o lau fuafuaga lea i lau Afioga, manaia.

O le isi vaega, pei lava ona avatu pea sou manatu i lea tulaga, o le vaega lea i le Matagaluega lenei i lou talitonuga, o le ki atoa lea o le atinaeina o Samoa. O le ogatotonu foi lea o le fesootaiga o le Malo ma nuu uma o Samoa. Ia tautuana ma oe, pe le ua tatau loa ona talafeagai ona sui le igoa mai le Matagaluega a Tina, tuu i ai le Matagaluega o Atinae o Nu'u ona aofia faatasi ai lea o tina, tama, ma i latou uma o nonofo i totonu o afioaga.

O le Minisita o Eleele, e i ai lava nai faitioga ia ou te talitonu ua oo atu foi i...

SUI FOFOGA FETALAI: Malie le sui usufono o lo o saunoa se i tuu atu pea le avanoa lea i le Afioga i le Minisita, masalo e i ai se mataupu taua e...

Afioga Hon Tuitama Talalelei Tuitama: Lau Afioga i le Fofoga Fetalai, e leai na ona toe faamanatu lava i le Maota, o le Matagaluega lenei, o le Matagaluega o Tina ma Tamaitai, Atinae o Nu'u ma Agafesootai. E le na o tina, o lea ua i ai ma atinae o nuu ma agafesootai a le atunuu. Ma le faaaloalo.

SUI FOFOGA FETALAI: Ia, ua manino lea vaega. Saunoa le sui usufono.

Tofa LEALAI PULE RIMONI AIAFI: Ia o lena ua tuu atu le tuualalo i lau Afioga, o lena ua e taumafai lava e faasao.

Ona oo mai lea o lau tala i le faamatalaga o le Tala o le Tupe pei ona tatou i ai nei, lau Afioga i le Fofoga Fetalai ma le faafofogaaga a Samoa ma le Minisita, o se Tala o le Tupe atoatoa lona tapenaga. Faatoa ou vaai lea ua lapopoa ni tusi e aumai ai ma detail, faamatala auiliili le mea e sau ai lea tupe ma le mea e alu i ai. Ae o lau fautuaga i le mamalu o le tatou Palemene, a aumai le Tala o le Tupe, e lua faamatalaga e aumai, o le faamatalaga o le Tala o le Tupe ma le faamatalaga o fuafuaga mo tupe a le Malo, lea e faapapalagi o le physical strategy statement. A tatou faitau uma la i tusi ia e lua, ona tatou maua atoatoa lea o le faavaa ma mafuaaga e fai ai le tala o le Tupe i le mea o i ai i le taimi nei. A o le upu aupito sili ona fia faatauaina i sou manatu, o le theme, o le sini autu o le Tala o le Tupe, tatou lalagaina faatasi se lumanai manuia mausali mo Samoa. O le upu e fia ave i ai lau faamamafa o le lumanai. Sa tatou amata mai e fua le faaoga i le tupe ua maua, o le taimi lenei, o le taimi lenei e leai lava se mea tatou te tepa taulai i ai na o le lumanai.

Lau Afioga i le Minisita o Tupe, o le faafitauli ua i ai nei le lalolagi, e le o se faafitauli faigofie. O le tele ma le ogaoga o faafitauli e feagai pea ma le lalolagi i tausaga ua tuanai, e tele le tamaoaiga, economic crisis. O le faafitauli lea ua feagai nei ma le lalolagi ma tatou, ua tuufaatasi le economic crisis, le tamaoaiga ma le soifua maloloina. It's a combination of the health crisis and financial, tamaoaiga. Ua matua ogaoga le tulaga o i ai mafatiaga

o feagai nei ma le lalolagi ma aafiaga o Samoa. O lona uiga o lau faamatalaga, tatou te le toe fua foi la le faaaogaina o le tatou tamaoaiga ma tupe i tulaga masani na sau ai mai i le fiscal strategy. Faafetai o lea lava e tumau a tatou aitalafu i lalo lava i le 11% ma le 20% lea o tupe faaalu, tupe maua. O lona uiga o lo o tele le avanoa e mafai ai ona nono tupe pe a manaomia. I lou talitonuga, ua matua tele le manaomia, tele le manaomia. Fai mai le faamatalaga a le IMF, i le taimi lenei, o le taimi lenei tatou te o ese mai ai i fafo mai faiga masani, we get out of our comfort zone, ae faaoga le faautautaga tatau, fua i le vaai, fua i le mafaufau ma tulaga o i ai le tamaoaiga ma le atunuu. O lea e le i oo mai le faamai, ae ua matua lagona le mafatia o tatou i le tulaga o le tamaoaiga.

O le mea e fia ave i ai le faamamafa lau Afioga, o le survival, survival. E 3 ni vaega taua e fia ave i ai lau faamamafa ina ia faaauauina le ola, human survival. O le sini autu lava lea lea ua tepa taulai i ai le lalolagi i le taimi lenei, ma e tolu lava ni vaega taua; (1) O le ola soifua maloloina. (2) O le fofoga taumafa, food security. (3) O galuega, employment. O vaega ia e 3 ua ave i ai le faamuamua ma le faamamafa i le taimi nei.

I le soifua maloloina, o lea ou te talitonu faamalo faafetai i le tulaga o i ai le tatou atunuu. E le tau selu atu pe faaviivii, o lea ua silafia e Samoa ma le lalolagi atoa lo outou tiute fai ma la outou galuega, saogalemu Samoa, faaauau ai le tulaga ua outou silafia e tatau ona faatino.

O tulaga i meaai, ia, e momoli lava le faafetai i le Malo aemaise le Minisita o Faatoaga, o lo o lava pea le fofoga taumafa aua Samoa. Faigofie, lava, o lea ua ou toe vaai ua toe fotu mai le fuata, faigofie foi ona fetuunai le avega o talo ma mea i fafo, ae faamuamua le fofoga taumafa o tatou. A lea tatou te vaai i ai i le tele o atunuu o le lalolagi. E oo lava ia Amerika o le atunuu milionea ma tulaga ese lona tamaoaiga, tele tagata ua fia aai. Ae a tatou? Faafetai i le Atua i lana pule faasoa ia Samoa. Na tatou pisa nei i le tatou tulaga ese sa avea ma faafitauli i le tatou isolation. Ae a? Lele ua matua avea ma puipuiga mo tatou. O le tatou tau fai mai nisi e vela, a o lea ua avea ma puipuiga mo tatou.

Ona ave loa lea o lau faamamafa lau Afioga i galuega. O galuega, e fua i ai tamaoaiga uma lava o le lalolagi. O le mea ou te faafetai ai lau afioga, o lea sa saunoa nisi o sui usufono i le tulaga o le siitia o le tamaoaiga o Samoa mai le amataga e oo mai i le taimi nei ma fesiligia le tulaga o le tamaoaiga. A tagai i ai lau Afioga i faamaumauga, a sau se tagata i inei e sue e a le tulaga o i ai Samoa? E i ai faamaumauga e muamua lava tilotilo i ai. E muamua lava alu i le Ofisa o Fuainumera ona aumai lea o le tilotilo lea po o a faamaumauga la e i ai i le tamaoaiga o Samoa po o le GDP. A tilotilo la i ai mai le 1990, na o le \$300,000 le GDP o Samoa sa i ai. E oo mai i le 2000 ua piliona, e oo mai nei i le 2020, ua \$2 piliona. O i ina la e fua agai i ai le tulaga o le atinae o Samoa, lea na mafua ai ona

aveese mai tatou mai lalo o atunuu e vaivai le tamaoaiga ma tuuina tatou i le atunuu ua alualu i luma lona tamaoaiga.

Lau Afioga i le Minisita o Tupe, faafetai i le Malo o lea ua aumai le Tala o le Tupe o lo o taofi pea tagata faigaluega a le Malo mo le isi 12 masina. Ae o lau tuualalo, i le tulaga o tagata faigaluega i isi vaega o le private sector aemaise le vaega o le turisi ma le lautele o le atunuu.

SUI FOFOGA FETALAI: Malie le sui usufono o lo o saunoa se i tuu atu le avanoa i le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, fai ma faa-Samoa ane au GDP leaga e le malamalama i ai matou itumalo i tua. E le afaina lou itumalo e nanunanu.

Pe mafai lava ona e toe ta i tua se i toe faalaulau mai. O le GDP o le tuuaofai lea o tupe maua a le atunuu atoa ma le Malo, faaopoopo faatasi ona maua ai lea o le tupe maua a le atunuu atoa. A vaevae loa la i le faitauaofai o tagata ona maua ai lea o se faitau taulalata i le tagata e toatasi lea e i ai nei i le \$10,000 i le tausaga. Ae manaia pe a toe faasau au fuainumera se i malamalama i ai matou itumalo mai tua leaga e le malamalama i lau lauga pe a faapapalagi nisi vaega.

SUI FOFOGA FETALAI: Se i tulai mai le sui usufono mamalu e faaauau se tali...

Tofa LEALAILEPULE RIMONI AIAFI: E faamalulu atu i lau Afioga i le Minisita, pei e sao a ia, ta te talanoa a ita e fua i tagata Faleata, foi lele o la e tilotilo nei i le TV, ma alu le computer aumai le numera. Ia lau Afioga i le Palemia, o le galuega lava lea a le faipule ia e fai, a ua vaivai lona itumalo, faa-Samoa e ia i le itumalo. Ae o le mea taua lea na saunoa i ai le Afioga i le Palemia, ua misi leaga ua fegauiai au pepa i le tama lea o Soalo e fai ma tago mai i ai le Afioga i le faipule, e sao, o le mea lea pito sili ona taua o le income per capita. O le tupe mo le tagata. Mai le 1990, e 1,700 sa fua i ai. E oo mai i le 2,000 ua 4,000, i le taimi lenei ua sili i le 11,000. Atonu e le i toe update le numera a le Afioga i le Palemia, a o mea ia na aumai nei lava ia te au, ua 11,000 le income per capita.

O lona uiga ua matua maoae le siitia o Samoa, maoae. O galuega a ai? O galuega a tatou uma. I le Tala o le Tupe ae le i taunuu mai le faamai, o tatou le isi atunuu sa matua siitia le tamaoaiga, lea e manino i le Tala o le Tupe, sa tatou i le mea foi i le lalolagi atoa, o lea ua amata ona sii le mea e siisiitia ai le tulaga o le tamaoaiga. Oo mai loa le faamai ma le tulaga o i ai nei o le tamaoaiga, o lea e pei ona ou talanoa atu, ua tatou oo i le mea e tau o le survival, survive, toe taumafai. O lona uiga la lena o lau tuualalo lau Afioga

i le Minisita ma le Malo, e tele tatou galuega mai le tuanai e oo mai i le aso. Aua tatou te alo tamala i le mea lenei. O le saunoaga a le Afioga i le Minisita, e tasi lava le tausaga lea na pau laitiiti ai le tatou tamaoiga, na o le 2016/2017 faasolo mai ai, le taimi foi lea ua tapuni le Yazaki. O lou talitonuga i le taimi lenei, ua 2 i le 3 Yazaki lea ua tapunipuni i le taimi lenei. Ae faafetai lava i le Malo i le taofiga o tagata faigaluega a le Malo. A o lau tuualalo lea. O au foi e i ai au tagata faigaluega e toa 10 lau Afioga. O lea la ua ou faamalie i ai, malie malolo i lenei vaitaimi se i tau feoloolo mai le... ae fetagisi. O le a la le tatou mea a fai? Ia ona ou taumafai loa lea e tau fetuutuunai foi lele ia maua lava sina tupe e ola ai nai tagata i lea vaiaso ma lea vaiaso, tatou tatalo atonu e oo mai ua lata mai se taimi... o tatou, fai mai le tala a le isi tama lea e nofo i lou fale e faigaluega i le EPC, se Leala, se a ala lava i le taeao tui le ovalola tui seevae feiloai ma le loli a le EPC, se ua lava a lena mo taita. Tusa lava pe \$50 i le 2 vaiaso a o lea ta te fiafia. E taua tele lau Afioga. Ia manatua foi la, o lea o le a toe foi mai tagata ia e i lalo o le RSA Scheme ona o fuafuaga foi i le agai i luma. Ia, tuua mai ma aoga i le faaiuga o lenei tausaga, o le a faatupulaia pea le tulaga o tagata faigaluega. O lea la lau Afioga, ou te talitonu o lena ua i ou aao le tulaga, se fofo o lenei faafitauli mo le agai i luma. Ae i ai si au tuualalo e fesoasoani i au tapenaga i fuafuaga a le Malo. 1. O lea ua tatou mautinoa ma le atoatoa ia, puipuia tatou mai le faamai e leai se faamai o i Samoa. Faafetai o lea ua talatala mea, a o lou talitonuga, tatala atoa le tele o mea. Tapunipuni pea le border pei ona avatu le fautuaga, a o a ni mea e tataua ona toe tatala i le mea sa i ai tatou muamua ae le i foi mai, ia, e talitonu lau Afioga ma le Malo ua tataua ona tatou tilotilo i ai, o faletalimalo i ona tulaga masani, o faleoloa, o faleaiga, fale kalapu, o mea uma lava, se o mea o lea e fai i le lalolagi.

E tele foi ni saunoaga i faleoloa ia laiti, e le o se mea fou lea manatu. Faafetai. Sa fautuaina i le 10 tausaga talu ai e fuafua i itula tatala, ina ia mafai ona galulue faatasi ma faasafua le tamaoiga. Afai o le finagalo lea o le Malo, lelei, ae tataua ona tilotilo i faaiuga o vaiaso i aso Faraile ma aso Toonai, ona o lea foi ua tapuni i aso Sa faleoloa nei, e tataua ona tau talatala laitiiti i tua faaopoopo le taimi.

O le aso Sa lau afioga, ia se i i ai se taimi leaga e lavea ai i i ma le mataupu silisili, leaga ou te musu e eseese faleaoga na tatou aoga ai. A o au lava ia, o lou malumalu, o lou loto.

O le isi au tuualalo lau Afioga ma le Malo, o le mea lea o le pili o le moli. Ia atonu talu lava ona ou sau i le Palemene o le mea lava lea o lea e fai ma faafitauli i le tele o pisinisi ma atinae o le tau o le eletise. I le taimi nei lau Afioga i le Minisita o Galuega, e i ai le tau faaopoopo lea... ou te le o talanoa i le tau lea masani consumption le tau a lea e faaaoga ai i lau iunite, ou te le tetee, totogi, totogi lau iunite, po o fea lava e te i ai totogi. Ae i ai la le tau faaopoopo lea ou te talanoa atu ai lau Afioga, e tataua ona silasila ma tagai i ai le Malo, e faataatiaese le tau faaopoopo lea mo lenei taimi, mo le isi 6

masina pe 12 masina. Aemaise lava i le mea lea o le fix rate lea e i ai nei. O le tau faaopoopo lea o le fix rate lea, na o le 100 lava kamupani lea e apply i ai le tau faaopoopo lea. Ia manatua foi o nai kamupani nei lea e faafaigaluega ai po o le 90% po o le 80% agai i luga tagata faigaluega i tua i le private sector. O le tau, e amata mai lava i le \$130 i le aso e oo lava i le \$1,500 i le aso le fix rate lea, e fai lava si taugata lau Afioga, aemaise nai tagata ia tai 50 agai luga tagata faigaluega. E le mafai ona faia se malilie aumai se undertake mai kamupani nei, taofi tagata faigaluega ae fesoasoani atu le Malo i le isi vaega lea o le fix rate lea. O lea ua aumai le faamama avega a le EPC, e reduce ai tuu mai lalo i le 50% le fix rate lea le tau faaopoopo lea. Lau Afioga, afai e \$1,500 lau fix rate lea e totogi i le aso, a tuu i lalo i le afa, ua \$750 i le aso lava lea, e ese mai lene ma le pili masani. Lau Afioga o le tatalo lene, se i tagai ane i le mea lea leaga e taua. Faataatia ese ae faaavagavaga nai tupe nei, ae aumai se maliega mai kamupani nei faatumau nai o tatou tagata, mo lenei taimi. Se o taimi nei, e le, o taimi masani, tatou te faia ai filifiliga talafeagai e fua i le tatou vaai ma le tulaga o i ai. Afai foi e i ai le monitoring...e i ai le mea foi lele o le latou return in equity...le mea foi lele e finagalo ai le Malo e toe faafoi atu pe 7%, e mafai lava ona fetuunai nei mea. E mafai ona fetuunai, ae o le tatalo lea mo lea vaega. Totogi pea pili, totogi pili aua le le totogia, ae absorb e le EPC ma tatou uma. Aua o le tau lea ou te faalogo i ai, o le tau mo le le totogiina o nonogatupe, lea e faatino ai lea galuega. E le o se mea leaga lea mea. Ia te au, o le a le mea o le a faasala ai tatou i nei taimi ona totogi lenei loan i lenei lava taimi. Tuu i tua i le 50 tausaga, togitogi malie, e sao ai le afioga ia Peseta, o tatou uma lava e loan. Ua ova ma le 30 tausaga o ou faigaluega o la lava e tau totogi au loan. E loan lava i aso uma, ioe, ae ou fai atu i lou toalua, aua e te popole, o taua e loan ae faaaooga mai le ta fanau e totogi ta loan. Ioe, e i ai le au totogi loan, e faaaooga e o ifo e totogi. O le mea lea o lea ou te talanoa atu ai i le vaega lea lau Afioga. O le isi vaega taua, ona o lea e patino tonu lava i tagata faipisinisi ia e faia ia e nafa ma le aufaigaluega. Lau Afioga i le Minisita o Tupe maua malo! o oe le isi Minisita toa. E tele au suiga lelei. O lea ua e saunoa o Iulai e amata ai, e leai o lou finagalo lava, ae mafai lava ona fetuutuunai nei mea. Ou te le o fai atu, e avatu se tuualalo e taofi, e leai, e le tataua ona taofia ona o mea lelei. O le mea e talafegai e laugatasia uma ai le aufaipisinisi e totogi mea nei. Aua e moni lava au, o le aufaipisinisi lea o lea ua leva ona i Samoa, o i latou lea na taulamua e fai le mea lea. Leaga ua tele pisinisi fou e o mai e faanunumi a latou lafoga. Ae o le tuualalo i lau afioga pe le mafai ona faataatia mo se 3 i le 6 masina ona faataunuu lea. E tilotilo foi i ai, o na e o atu tou te talanoa, a mafai lava le tagata ia, faatino ona e tele le capital cost a isi ofisa. Ae taatia atu i ina i lau Afioga lene vaega. Ona oo mai lea o lau faamatalaga i le stimulus package o le faamama avega ma le faamanuiga na aumai mo le tatou atunuu, faafetai tele lava. Faafetai muamua lava i le NPF lea e pito mai lava i luma le \$35

miliona o tatou tupe ia o le a tufa. E tasi lenei Matagaluega e ese le talimanao i o tatou mafatiaga. Ae o lau tatalo i le Ofisa sili ma le, aua le aumaia faa-loan le mea, tufa loa i tua, le 7% lea. Tufa i nai tagata, e fai le filifiliga a le tagata ia, o le tagata o la e lava lana faasoa taatia ai i totonu o lana account, ae na o nai tagata e manaomia, fai se lua mealofoa i ai, ave sao i tua le 7%, tusa a nai tagata e faaaoga i lenei taimi. Ioe afai, aua o le ponesi lava lea e aumai o lea ua tele i le 10%, afai e 10 %, o lona uiga e le o se mea fou o le mea ua masani ai. Ae a tufa fua loa i tua, ua matua sili le manaia. E sili le manuia o le foai i le na te talia. Ioe, a o matou nei o le Palemene, lea na saunoa i ai si uso o Fagaivalu, o le isi ulupoo laititi lea. E le pei e malie, ae le malie. E manaia le agaga na fai ai e le Malo le penisione lea mo tatou. Ae ou te talitonu e tatau ona tilotilo i ai i le faatinoina, leaga e tatau ona fai faatusatusa foi i le tatou ia manaoga i lenei taimi. Aua afai la o au na ou sau i totonu faatoa 30 ma ona tupu ou tausaga, ua matua leai sau tupe, ae ou alu atu ou te loan e faaaoga lau penisione lea. Ae le mafai leaga e faasa. E le tagai i ai, pe le mafai ona i ai ni aiaiga faapitoa i le mea lea, e fesoasoani ai ia matou sui usufono. O le isi mea, e tasi lea vaega aua o lea e fai le latou tariff lea e faaopoopo i le pasene i lenei taimi mo tagata faipisinisi. Ia, na o le tuualalo lava, o mea lava e mafai ona fai, e mafai ona fetuutuunai. Faafetai e tele le faamama avega i nonogatupe a tagata laiti, ae i ai foi nonogatupe a tagata tetele. Aemaise o le interest rates, e le gata i le NPF, a o tua i tamai pisinisi ia i tua, ua tatau ona regulate. Uunai i ai le central bank ua tatau ona fesoasoani ma ave se tou se tuualalo po o se faatonuga i tamai banks nei, tamai faletupe nei laiti e i tua. E aua nei default ina loan a na i tagata lea e faigata i lenei taimi, se i oo i se isi taimi.

Ona oo mai lea lau Afioga, e tatau ona fai sau tala, i le Tulafono lea e i ai nei, ua fai foi ma tulaga ua tele ai finagalo ua faaali o le atunuu. O le tele foi o manatu, o le atili ai lea ona malamalama ma o tatou iloa, se aoga ma se lelei o se mea e fai. O le mea muamua lava i lou talitonuga, po o ai na usu? Po o le a le mafuaaga ua fai ia suiga? O lea ua tatou i ai uma lava ma tatou talitonu na tatou ola mai i Samoa. E tele faafitauli e tulai mai pea, ae o ai la e sulu i ai mo se fofu? E sulu mai i inei i le Palemene. O lea na mafua ai na faia ai nei suiga talafeagai. Ae le tetele ni suiga. E le tetele, ae o le mea lea e fia faaautu i ai lou manatu. Na ma talanoa ma nai ou tuafafine i fafo i le vaiaso na tea nei. Na fai atu i ai lau tala, vaai outou, e lagolago, o matou nei i le Palemene o matai Samoa. O tama, o aiga, o matou foi e filifili e ola ma uma ai i inei i Samoa o matou olaga. O le uiga o lau faamatalaga, o matou o tausua mea, we are trustees. O a ni tulafono matou te faia, e faia ma le alofa, e faia ma le mautinoa ia manuia Samoa. Aua a i ai se sui usufono e sau i totonu o le Maota lenei ma sona ia lagona ma sona manatu e fai ni tulafono e faapito sona manatu ma afaina ai le nofo manuia o Samoa. Talofa i ai, talofa i ai, ioe, o la e tupu ae lau fanau.

SUI FOFOGA FETALAI: Faamanatu atu i le sui usufono ua toe 2 ou minute, ona faamaea lea.

Tofa LEALAILEPULE RIMONI AIAFI: Lau Afioga faafetai. Faapea ta ita...ana o si toeaina o Toleafoa e.....e umi lava lou taimi e si toeaina ae o lea foi ua.....e usitaia lau Afioga. Matautu ia e manatua o au o Lealaileauloto. Ae e te matai foi i Vaitele, e iu ina faatea oe ma le nuu pe a fai o le faiga lea.

SUI FOFOGA FETALAI: Faamaea mai lau lauga. Sa tau tuu atu le avanoa.....

Tofa LEALAILEPULE RIMONI AIAFI: E ava tele, faamalulu atu i lau Afioga, o oe o le uso, o ai matou te tua i ai, ao oe...ua oo atu i le MNRE i le Afioga i le sui Palemia ua galo ia te au. O le mea lea o se mea foi lea a e taamilo nei i Vaitele i faleinisinia, ola le mea o le taavale, o taavale pala ma taavale lavevea. O lea sa ou taua foi muamua pe le talafeagai i lenei taimi ona e vevesi lo tatou Malo, po o se isi foi i tua faipaaga, se masini e crush ai taavale ma lau i fafo. O le matua tele le faaletonu. O i i le vai, na mu le fale lea o le Regulator, e mai le fuimu e leai se hydrant. Ua manaomia se hydrant i i, o le tele o fale o le Malo lea faatoa fai, fale fou ma le fale faamasino, Maota o le Palemene, matua manaomia lava se hightran i i, mo le vaega lea, e taua tele. O le isi mea lau Afioga i le sui Palemia, nai aiga ia e nonofo i i. Sa talafeagai le mea lea i aso ia e le i tele ni aiga i Vaitele. O le mea lea o le vilimaa, ma quarry ia e i ai, i totonu o le area lea tala ane o le maketi, tele lava le faaletonu lau Afioga. Sa talafeagai i aso ia i le taimi na tatau ona ave se faatonuga e tatau ona relocate mea nei. Relocate ae faavagavaga leaga a alu i luga le ea, ma tele ai le afaina o i latou, ua faatupulaia i latou e nonofo i lea vaega o le atunuu. Lau Afioga, e lei taitai afa lau lauga lau Afioga, ae o le a fai ia lau faafetai.

SUI FOFOGA FETALAI: Faafetai manatu mai.

Tofa LEALAILEPULE RIMONI AIAFI: E faafetai muamua lava i lou itumalo. O le itumalo o Faleata o Sisifo o le itumalo faavae o Samoa. Ioe o lea e maua i i i faamaumauga. O lea ua tasi le finagalo o le malo e to lo tatou matupalapala, o le a vaevae lo tatou itumalo. E ui lava ina le toe i ai le itumalo o Faleata i Sisifo, ae o lea ua 3 o tatou itumalo mavaevae. E 4 i le Faleata i Sasae. E avatu ai le faamalo ma le faafetai i le Malo. E faafetai ai i lou itumalo o Faleata i sisifo, faafetai i la outou faaaloalo. La outou pule lea. I le afio, susu o Seiuli ma ona alo. Lau fetalaiiga Ulugia ma le tou aiga sa Ulugia ma le falefiaoalii. Lo matou nuu i Saina le afio o le alo o le Tuitoga ma Lauaki ma Motupuaa. Aemaise foi le alalatai o laua matua, Ale ma Ulu

ma o la aiga, lafoautoe. E faapitoaugafa se faamatalaga i si o matou afioga i Vaitele. I le afio o le tama o le fale, afio Mataia ma le lua toa lua Toi ma Tulaga, taligapula, lau fetalaiga Lealailepule. Ioe, e tau oo atu ia Galumalemana ae e le o lavea, e le afaina. Malo le tou faaaloalo faafetai, o lea ua fesui ai tatou itumalo. O lena ua to le tou matupalapala, e tautua ai le Malo ma ona tagata, malo faafetai. Ona oo mai lea i le Malo, lau Afioga i le Palemia, sa e tulai mai lava i nei mea o crisis, na amata a lau Nofoaiga o le Economic crisis o Samoa, tulaga o le tamaoiga o Samoa, 81, 82. Amata mai ai i ina lau Nofoaiga, amata mai i ina sosoo mai ai ma isi mau faafitauli, afa, matagi lolo-vai, tsunami e le masino ia mea. Ua oo mai i faamai, o lea ua oo ina tuufaatasi le faamai ma le tamaoiga, o e tauaveina lava le sa o Samoa. Ae i ai ma le isi faafitauli, e luitau i aso uma, o le political crisis. Mea e faaaau i aso uma aso uma. Ae a? Faamalo le toa, ou te le faafetai atu, o lou tiute lea, e pau o le tatalo, tumau le loto tele, loto toa aua Samoa. Lau Afioga i le Sui Palemia ma le mamalu o le kapeneta, malo faafetai. O le taimi leni tatou te tutu faatasi, aua Samoa. O taimi o faigata o taimi o puapuaga o taimi ia e iloa ai taitai. Malo galulue malo faafetai. O le mamalu o sui usufono o le Palemene, o le naunautaga lava, ia uma leni Palemene o tatou galulue faatasi ma tatou toe o mai uma i le isi Paeiga.

Afioga i le Fofoga Fetalai, aemaise le Tama o lo o faafofoga mai, lau Afioga ia Toleafoa, e avatu lava lau faamalo ma lau faafetai Toleafoa, lau tautua matavela ia Samoa ua loa lau tautua. Faamanuia le Atua i lou soifua. Matautu e ese lou onomea, e le selu atu. O le tama ua masani leaga o le muaau, o le muaau o Puleono. Lou leo, ta fia faalogo....

SUI FOFOGA FETALAI: Faamaea mai le lauga Leala o lena o le a e

Tofa LEALAILEPULE RIMONI AIAFI: na i ou matua o faafofoga mai, o faalogologo mai, papa ma mama faafetai i le lua tapuaiga ma le lua faamanuiaga i le lua atalii. Na i ou aiga ma Samoa atoa, aemaise le aufaigaluega a le Malo, Samoa atoa ia tumau le filemu ma le fiafia o Samoa ia i tatou. Faafetai, manuia.

SUI FOFOGA FETALAI: Faafetai, malo saunoa malo fetalai. Lealailepule, aua ne i galo ia te oe o lou suafa o Tupuola. O le mea sili na e te malosi, se i fonu le tatou nuu ona maua lea o lou faaiuga. A o leni aso ua taliga lava e fialogo. Ua leva ona fia malolo le Maota, ae o le taua o le saunoaga, o lea na tuu atu ai le avanoa. O le mea lea faafetai, o le fesoasoani foi, o le tuualalo, aua se manuia o tatou tagatanuu e ala i le faigamalo. A outou afioga i Minisita aemaise sui usufono uma o le Palemene. E talu ai o lea ua tatou taunuu tonu lava i le taimi o le tatou malologa masani, ou te faasilasila atu ma le faaaloalo. O le a faataatiaese galuega a le Maota mo lana malologa mo le 15 minute.

Na faataatiaese Galuega a le Fono Aoao Faitulafono mo lana malologa masani i le itula e 8. 23 i le po, ma toe faaauau i le itula e 9.23 i le po.

Na toe faaauau Felafolafoaiga i luga o le faitauga o le Tulafono Tau Faaofi o le Faatatauina o Tupe Faaopopo (Nu 3) 2019/2020 & Tulafono Tau Faaofi o le Faatatauina o Tupe 2020/2021.

SUI FOFOGA FETALAI: Ou te faasilasila atu ua toe amatalia nei Taulumaga o galuega a le Fono Aoao Faitulafono. E i ai le lagona o lea ua sao i alo le taumafataga a le Palemene. Maua foi se faasiliga malosai aua le faaauauina o le tatou galuega i lenei afiafi, malo le onosai malo foi le usufono. O le avanoa lea, ou te matau atu e le o nofoia le Nofoa e le sui usufono mai Palauli i Sisifo, a o lea sa talosaga mo le faia o lana lauga i le afiafi lenei, ae le i oo i le taimi e tuuina atu ai le avanoa i le sui Taitaifono o le Komiti o Tupe faapea foi le Afioga i le Taitaifono. O i o lea ua tau mai le sui usufono....

Afioga Afoa Amituanai Faleulu Mauli (Palauli Sisifo): Lau Afioga i le Fofoga Fetalai, ua uma ona ou talosaga i le tatou Fofoga fetalai analeila, o au e faamulimuli i ai le tatou lauga, sosoo ai loa ma le taitaifono lea, o la ua talia.

SUI FOFOGA FETALAI: Malie le sui usufono, o lea ua ou faatonuina oe o le taimi lenei o lau lauga. Sosoo ai ma le sui Taitaifono, faapena le Taitaifono. O le mea lea, o lou avanoa lenei ma le faaaloalo.

Afioga AFOA AMITUANAI FALEULU MAULI: Lau Afioga i le Fofoga Fetalai, o lea ua sauni se i maea le lauga a isi sui usufono ia e totoe, ona faamulimuli lea i lau lauga e pei ona approve mai e le Fofoga Fetalai analeila. O la e iloa e le clerk.....

SUI FOFOGA FETALAI: Faafetai. Mo le silafia e le sui mamalu, ua maea sui usufono e fia lauga. O lea ua oo atu i lou avanoa, afai e te le talia, o le a faasolo galuega a le Maota. O le mea lea ma le faaaloalo, o le avanoa lenei mo Palauli i Sisifo.

Afioga AFOA AMITUANAI FALEULU MAULI: Faafetai i lau afioga. O le a usitai ia i lau fanoga. Se i sue mai pepa o lau lauga ona e lea e le i ready mo le taimi lenei a o lea o le a taumafai atu.

E muamua ona sii le faafetai ma le faamanu i lo tatou Atua ia Ieova lo tatou Tama oi le lagi, ona o lana tausiga alofa ia te i tatou ma le tatou atunuu. Ae i lenei taimi, ou te fia faatalofa atu i lau afioga i le Ao mamalu o le Malo ma lau masiofo. Lau Afioga i le sui Ao faapea foi le Sui o le fonu a sui tofia ma lou faletua. Lau afioga i le Palemia faapea le Kapeneta ma Minisita lagolago. Lau Afioga i le Faamasino Sili, ma alii ma tamaitai o le faamasinoga.

Lau Afioga i le Fofoga Fetalai, ma le mamalu o le Palemene. E faatalofa atu foi i Ofisa Sili o Pulega o Matagaluega ma Faalapotopotoga a le Malo. Ou te fia faatalofa atu foi i le paia o le aufaigaluega totofi a le Atua i fatafaitaulaga e fia, faapea foi le paia o Samoa o lo o faafofoga mai i maota ma laoa ma so o se tafa o le lalolagi. Ou te faatalofa foi i paia, aua aiga ma a latou tama, o tama foi ma o latou aiga. Tumua ma Pule, Ituau ma Alataua, aiga i le tai ma le vaa o Fonoti. E faatalofa atu foi.....ou te ofo alofa atu foi i le Kovana o Amerika Samoa ma le faigamalo a Tutuila ma Manua. O paia aua pulega faatonu le faamasinoga sili ma le ofisa o faamasinoga. Le fofoga fetalai ma le Peresetene ma sui mamalu o maota e lua, o le fonu aoao faitulafono a Amerika Samoa. O paia aua sua ma le vaifanua, fofu ma aitulagi, ituau ma alataua, saole ma le launiu na saelua. Afifio faatuiolemotu, alalatai totoa o le faleula ma upu ia oe le Manuatele. Ou te faatalofa atu foi i si ou itumalo o Palauli Sisifo Nu 1. O le paia i le aiga Salevalasi o Falefa ma faigata, lau fetalai Faifumu ma le mamalu Salemuliaga. Ou te faatalofa atu foi, i paia i aiga faapea matua ia Tuato ma Tolovaa, ma le mamalu ia te oe Salemuliaga. Ou te faatalofa atu foi salaulu ma suafa faapea fetalai ia Faatoafe ma le nuu faigata. Ou te faatalofa atu i tapaa ma aiga, mamalu i le falelua. Ou te faatalofa atu foi i tapaa ma aiga ma le mamalu i le ailaoa. Ou te faatalofa atu foi i tapaa ma aiga faapea le mamalu i e na tai ma gagaimalae.

E faatalofa atu foi i susuga i faafeagaiga taulagi i fata faitaulaga e fia i Palauli sisifo o lo o asuina le vai o le ola aua se manuia mo Samoa. Faafetai faamalo tatalo ma le tapuaiga.

Ua le po se lilo i le finagalo o si o tatou itumalo o Palauli i Sisifo, ina ia ou momoli atu i le tatou Palemene ma le Malo le tatou le taliaina o Tulafono e 3 o lo o opea nei i le Maota. Faafetai i lo tatou itumalo o Palauli i Sisifo, i le tou taliaina o lau tuualalo, ia tou feiloai muamua ma le komiti faapitoa faa-Palemene, ua malaga atu i tatou nuu ma alalafaga e talanoaina ma faamalamalama ia Tulafono Tau faaofi e 3. E toe o Fuailuga ma Fuailalo, lea o le a oo atu i ai le komiti pe a maea le fonu a le Palemene. O le mataupu tuga o lo o popole i ai lo tatou itumalo, o le aiaina lea e le Tulafono o le fai o matai sao. Ou te faasao le popole o si o tatou itumalo. O le a le mea e aia ai fua le Malo, e pulea a tatou measina, aiga e pule tutasi lava aiga. Pe tasi 5, 7, pe 100 latou sao, aua le aia fua le pule ma le measina a le atunuu. Ae faafetai o lena ua oo atu le Komiti ma ua ou faalogo, o le a latou fautuaina

le Malo ma le Palemene e aveese ia fuaiupu o le tatou tulafono. Ma o le a ou taumafai e follow up...

SUI FOFOGA FETALAI: Faalavefau o saunoa le sui mamalu, talu ai ona o tatou Tulafono tumau. Muamua e le tataui se sui usufono ona faitauina lana lauga, 78(9), o lona 2 o lea ua amata ona e saunoa i le Tulafono Tau Faaofi, o lea e le i taunuu mai o lea e faagasolo galuega a le Komiti ua tofofi i totonu o le Palemene lenei, aua a tatou Tulafono ia. E i ai le lagona, tefa le tauala ae faasee i si mataupu ae faataoto Tulafono ia, o lea e faatino le galuega i le taimi nei, o se taimi oi luma ona talanoaina lea e le Maota lenei. O le faasoso atu lea o le fesoasoani atu lea, e tusa o le saunoaga a le sui mamalu. Ae faaauau lau saunoaga i nisi mataupu.

Afioga AFOA AMITUANAI FALEULU MAULI: Pau le mea taua o lea ua uma ona momoli le finagalo o lou itumalo, e fia faalogo i le sui usufono, e momoli le latou finagalo i le tatou Maota fono lenei. Ae o le mea e sili ai, o lea ua e faafofoga mai, ma tatou faafofoga ua fai le tiute a le sui usufono, e momoli le finagalo o le itumalo. Ae o le i ai foi se taimi ma te toe feiloai ai aua o lea e umi lava le taimi.

SUI FOFOGA FETALAI: Alu ese loa ma le mataupu lea

Afioga AFOA AMITUANAI FALEULU MAULI: Faafetai lava mo le avanoa. Ou te fia talanoa i le taimi lenei i le tulaga o le, o lo o fai se taua i Amerika, le taua i le va o fanau a le malamalama e taitai ai Iesu, ma le fanau a le pogisa po o le pouliuli, children of darkness, o lo o fai le taua i le taimi lenei ma o le faamai lea o le Koviti-19, o le tasi lena faamai e afua mai i le taua lenei, e moni lava e amata mai Amerika ae o lea e aafia ai uma tatou i Samoa. Ou te fia talanoa atu la i le tulaga lea, o lea ua aafia Samoa i le faamai lea. Ma e tataui ona tatou taumafai e suesue se fofo, ma se tulaga ina ia mafai ai ona faafoi, aua o le taimi lenei o lea ua ou vaai atu, ua matua fefefe lava lo tatou atunuu. E oo i le Palemene lenei ua matua fefefe lava i le faamai. A o lou talitonuga o le faamai lea ua taua o le faamai taufaavalea. O le faamai pepelo, e taufaafefe. E ala ona ou taua le tulaga lena, o lea ua ou talitonu o le faamai lenei e le o se faamai oti e pei ona tatou silafia i ai. E le pei o le flu lea Spanish 1918. O le tama lena o le matua leaga lava. E le se faamai foi lea pei o se faamai lepela e pipisi. A o le faamai lenei, ou te iloaina, o lea ua i ai faamaumauga ma sailiiliga e pei lava o le flu. E pei o le tausoga, cousins, o le mea lea o le flu po o le cold, so e le o se tulaga la tatou te faapopoleina ai. O le tulaga foi lea faapea e.....o le taimi lenei ua fai le race a saienitisi uma o le lalolagi latou se o e sue se vaccine, e fofo ai le faafitauli lea, le faamai lea. Ae i le tulaga lava o le mataupu lea, e alu le isi e 20 tausaga tuana'i, e 7 ituaiga flu faapea na sau, e oo mai i le taimi lenei e le i maua lava

se fofu po o se vaccine. E pau lava le fofu lea e i ai i le taimi lenei o drugs. O lea e i ai panadol o amoxil, ma isi ituaiga tulaga na. A e fiva tele foi, aumai le ie malulu, e fusi ai oe, ona e toe malosi lea. So o le flu lea e i ai i le taimi lenei le Covid-19, e le tatau ona tatou fefefe ai. Sa ou tilotilo i le TV i le tulaga foi lea po o mo mea o tagata foi ia na aafia pe 7 miliona ea, le lalolagi. Ae e tuu mai ia le tulaga o tagata ua recover, pe 3.5 miliona. Ua afa lelei ia le tulaga o tagata ia ua toe recover lelei i le faamai. O lona uiga, o lo o i ai lava fofu i totonu uma o le lalolagi, e faafoia ai le faafitauli lea. O lona uiga, e le tatau ona tatou fefefe.

Ou te talitonu foi i le taimi lea foi lea sa amata ai ia le shut down o le tatou atunuu, sa ou talia ma sa talia uma e le atunuu ia fuafuaga ia sa faia e lo tatou Malo. Tapuni ia lo tatou border, tapuni ia pisinisi ma le tele o mea faapena. Sa talia lelei ona sa tatou fefefe, ae e pei le faamai lea o le faamai lea o le Sapanish flu, 1980 lea sa aafia ai lo tatou atunuu. E tai pei foi la le faamai lea o le lepela, lea sa faaunuu ai tagata i Makonai a. O lau tala atu, e le taitai ona faapena le faamai lea. O le faamai lea e pei ona talatala atu, o le cousin o le flu lea o le cough, mea masani. So o lau faamatalaga...

Afioga Hon Tuitama Talalelei Tuitama: Lau Afioga i le Fofoga Fetalai...

SUI FOFOGA FETALAI: Malie le sui usufono o saunoa se i tuu atu le avanoa i le Afioga i le Minisita o le Matagaluega o Tina ma Tamaitai.

Afioga Hon Tuitama Talalelei Tuitama: O se mea e fia faasao leaga o lea e faafofoga le atunuu ia aua o lea foi o lo o afifio ma papaaao e o malamalama i ia tulaga, ona o lea ua aumai ia le molimau a le sui usufono, o le faamai lea e le o se siama. E le o se mea e ao ona tatou fefefe ai.

Ia na ona ou tulai atu lava e sese le faaaliga lea. O le faamai lea e mafua mai i le siama e tau o le virus. O ituaiga siama ia e eseese lea e mafua ai faamai. O isi o bacteria, lea e i ai le bacteria lea e mafua ai le lepela, o le siama foi. Ia a o le faamai lea e tai pei o le flu, o le flu foi o le virus. O le siama, o lea e mafua ai.

E tutusa foi la ma le COVID-19 lea, o le siama foi. Talu ai la ona o lenei siama e fou, e le i aafia muamua ai se isi. E leai la ma se tasi ua i ai se malosiaga, e mafai ai ona tetee atu i ai i le siama lea. Ae se i ou faamatala la ia puipuiga o lea e mafua ai, lea e taua mai e le sui usufono, e faapea e aua tatou te fefefe ai.

A oo ina ulufia ia lou tino e le siama lea, ona faaleagaina ai lea o ou totoga. I le matau atu i le siama lea, e fialia tele la e ulufia ia musele o le mama o le tagata. Ma o le ala lea e mafua ai ona faaletonu manava a tagata ia ua tigaina i le faamai lea.

O le masani a le tino, a ulu atu loa se siama, e faailoga e i latou o le foreign body, o le foreign body. E le o se itutino e masani ai le tino o le tagata, a o

le tino o le tagata ua fausia, i se tulaga e i ai ona autau e puipuia ai le ulufale mai o ni foreign bodies i totonu o le tino. O lona uiga la, afai e ulu atu le siama lenei i totonu o le tino o le tagata, ona galue loa lea i le tino, e fausia ia le autau lea e taua nei o antibodies. O le autau la lea, e o agai i le vaega o le tino e i ai le siama, ia ma tineia ia le siama lea, ina ia aua ai ne i mai ia le tino lea o la e foi e ola latou.

O le faalavelave la o le siama lea ona e fou, e le masani ai tino o tagata. E oo mai le siama lea, e pei la o le oo mai o le siama o le Spanish flu i le 1918 lea na tatou aafia ai, na oo mai foi e le i i ai se siama muamua faapea i totonu o Samoa. Ma o le ala foi lea, e le i ai se puipuiga, e le i saunia tino o tagata Samoa, e tetee atu i le siama lea. O le mea la lea e tatou te fefefe ai i le siama lea, aua a oo mai i Samoa, e leai lava ma se tasi o i ai se malosiaga e tetee atu ai. It takes time, e fausia ai e le tino ia lana autau e tetee atu ai i le siama lea ma tineia atu ai le siama lea, pe a ulufia ia lou tino.

O le ala la lea, o lo o tatou faatalitali, ma tatalo i le Atua, ia maua se vaccine. O le vaccine mo le silafia e lenei Maota, e fausia mai i le siama ua uma ona tafana i uila ma suia lou tino ina ia aua ai ne i tupu se mai i lou tino, ae e mafai la e le siama lea ua liliu i faiga faasaienisi, ona faaaoga ai lou tino, e fausia ai mea ia o le autau lea o lou tino, e tau o le antibody. A oo la i le taimi e ulufia ai lou tino i le siama moi, lea la e pei o le Corona virus, o la la ua sauni lou tino e tetee atu i ai. O le aoga la lena o le vaccine.

Faamoemoe la o Samoa lea e i ai i le taimi nei, ia oo mai le siama, ua i ai le vaccine. E vaccinate uma tatou uma, ae e le i oo mai le siama ua sauni uma mea e tetee atu ai i le siama lea, ina ia aua ne i aafia tatou. E pei o tui ia na fai i le misela. O le misela foi, o le virus fois, o le isi ituaiga virus. O le mea la lea lau Afioga i le Fofoga Fetalai, ia na ona ou tulai atu e faasao e faigata ia te au ona ou gugu, ma faalogologo i ni faamatalaga e le tonu, ne i taitaiina sese ai le mamalu o lo tatou Maota, mamalu o sui usufono, ma le faaloalo tele.

SUI FOFOGA FETALAI: Faafetai i le saunoaga lau Afioga i le Minisita, ou te manatu ua malamalama ma manino lelei ia le sui usufono e pei ona saunoa, i le tulaga ua i ai le faamalamalamaga e alii fomai ua uma ona faauuina, latou te silafia mea ia. Aua ne i galo i le sui usufono, ia e fai lava si faigata ona tape o le virus rather than bacteria. E lelei ona ou faailoa atu o mea na, e fai lava sina faigata e faamoemoe tele i le antibody. Ia ae e saunoa, se i saunoa.

Afioga AFOA AMITUANAI FALEULU MAULI: Faafetai atu i le Fofoga Fetalai, faafetai foi i lana Minisita mo le faamalamalamaga. O lea ou te fesootai ma saienitisi ma doctors e pito i sili ona atamamai i le lalolagi lenei, i tulaga o mea faapenei. O lau fautuaga, update tatou i le tulaga lea ua i ai le mea la aemaise le virus lea aua e fou ia le virus lea.

O le ala foi o lou talanoa atu i le virus, ua tele lau suesuega ma feutagaiga ma saienitisi e sili ona atamamai i mea tau virus, virologist. O mea faapena, o lea ua ala ai ona maua lou taimi e faamalamalama atu ai i lo tatou atunuu, aua o le mea lea ua tupu nei, ua nao le tou fefefe.

Talofa i si o tatou Palemia ua faasese e le aualii ia, e fai lana mask, ae matau oe, o le mask lea, e mafua ai ona maua oe i le mea foi lea o le stress. Ua le lava le okesene e alu i totonu, stress, maua ai foi lea o le ita. O le mea lena na mafua ai ona ita ia le i le tuafafine o le Minisita le Sui Palemia, ona o le faiga o lana mask. A na aveese lana mask, e leai se mea e tupu. O taimi foi lea na fai ai le mask a le Palemia, sa vevesi ai foi ma si ou uso lea. O lea la ua o tatou tilotilo i le sao o le mea lea, aua ne i toe faia se mask. Fautua uma atu ia outou, o le mask, e na o tagata lava e fomai, e fai ia latou mask ina ne i te i ua addict ia le o le taimi lea...

Tofa Hon Faimalotoa Kika Iemaima Stowers: Lau Afioga i le Fofoga Fetalai...

SUI FOFOGA FETALAI: Malie le sui usufono, alala mai lalo. E pei ua, ae tuu atu le avanoa i le Afioga i le Minisita. Ua mamao tele ia lau talanoa, ae e le faamaonia mea ia. E lelei ona faaese ese o le a tuu atu le avanoa i le Minisita, leaga o lea e faafofoga le atunuu.

Tofa Hon Faimalotoa Kika Iemaima Stowers: Faafetai i lau Afioga i le Fofoga Fetalai mo le avanoa. Ua leva lava ona ou fia tu atu analeila, ae faafetai atu i le Afioga a Tuitama aua o le Fomai. Ae ua leva ona ou fia tulai atu, a silasila foi i le tautiga lea e i ai o tatou uma lava i le Malo atoa ma le atunuu atoa, e pei o se ao faamalumu mai lea e i o tatou luga, e fai lava a tatou galuega ae o lo o i ai pea le popole.

I le taumafai atu o le Matagaluega aemaise alii ma tamaitai fomai, o lo o monitor i taimi uma, i le World Health Organisation fesootai ma i latou o lo o maua uma ai faamatalaga o lenei faamai, ma le taumafai atu la o le Matagaluega aemaise foi le Komiti o lo o lagolago malosi e aumai ai fautuaga i le Kapeneta, a o tatou i ai ai i lenei taimi o le le mautonu ma le faigata. Ia ae o lea o le aumai le faamatalaga lea e faapena ona e pei e faaataata lafoga ae popole i le faafofoga mai o le atunuu i le taumafai atu ia faamalamalama ia lo tatou atunuu i mea e ao ona fai, mo le puipuiga o le soifua ma le ola o le atunuu. Afai la e faaataata lafoga e isi sui usufono, ona faanoanoa tele ai lea o le agaga ma le mafaufau, ona o le faanoanoa tele ai lea, ae o lo o faafogafoga mai foi Samoa, ia e le o tatou o ni tamaiti.

O tatou o Taitai o le atunuu, faafofoga mai i le tatou talitalie ma e pei e malie i se ata tifaga o se mea faapena. Ae e lagona ia le faanoanoa pe afai e tatou te allow ina ia ituaiga faapea e tatou te talanoa ai ae o la e faafofoga mai ia le atunuu la e... ae o lea e ou te taumafai e tatou te puipui lo tatou

atunuu. E i ai la si ou popolega, e faaluafesasi ai ia... e le tonu uma foi ia mafaufau a tagata. E faauiga sese foi e tagata ia ituaiga mea faapenei, ia ona tatou maumau ia lo tatou tautiga, i le galuega tele ua leva ona tatou pologa ma taumafai e fai, ia ae ua tele foi ia tupe. I le faatusatusa e pei ona taua i le misela, o lo o mamafa pea i lou mafaufau ina ua tofi au ou te alu ai i le Matagaluega lea, leaga o lea na ou vaai tino i le misela.

Afai la e ofi mai le faamai lea, ou te talitonu lava au ia o le alofa o le Atua e puipuia Samoa ae i le taimi o le misela sa tele teams na palalasi mai fafo, e fesoasoani i ai tatou i le misela. O le taimi lenei, ua o tatou le maua le avanoa lena, o le lagolago mai fafo. A sao mai le faamai lea, ona ou tilotilo lea i le mea na ou vaai ai i le misela, talofa e ia tatou, pe mata e tatou te gafatia? Le aofai o fomai lea e i ai totonu o le tatou atunuu e na o le 68, lea e serve ina lo tatou Malo faatasi ai ma fomai ia ua auina atu i tua i nuu ma afioaga i Upolu nei ma Savaii, e le taitai gafatia e lo tatou atunuu ae e tatou te faamoemoe i le alofa ma le agalelei o le Atua.

So o le popolega lena o lea ua tilotilo atu i ai pe a faapea tatou talatalanoa faaataata lafoga ia le mataupu lenei o lo o faapena ona aafia le lalolagi atoa, ae e tatou te mafaufau loloto i ai, po o ai e tuuaia, tuuaia, o tatou lava nei. O fea na outou i ai a ua le malu le atunuu.

Ia lau Afioga i le Fofoga Fetalai, atonu e i ai se isi taimi e toe fai ai se isi faamatalaga ae o le popolega lena o le Matagaluega o le Soifua Maloloina aemaise o le tautiga o le Komiti aemaise o le Malo ma tatou uma lava. O lo o tatou uma o tatou itumalo ma tatou i o tatou tagata, faafetai.

SUI FOFOGA FETALAI: Faafetai mo le saunoaga a le Afioga i le Minisita o le Soifua Maloloina. Ma ua i ai le manatu o le Nofoa, leaga e i ai mau ma molimau, i le tulaga o le afaina o le soifua ma le ola, ae e leai se vailaau e fofo ai. O lea ua afua ai ona faia ia tulaga uma i si o tatou atunuu, e ao ona puipuia tatou i le oo mai o le faamai lea i totonu laufanua.

Ou te poloaiina ai le sui usufono mamalu, o lo o saunoa i le tulaga lea, e see ese ma le mataupu lea, ae faaauau lau saunoaga i nisi mataupu leaga o lou lava lea finagalo, o lou lava lea finagalo. Ae o le agaga ua autasi ai i le Atua, aemaise le puipuiga mo le saogalemu o tagata uma o le atunuu, ia o le agaga lena. E talosagaina ai le sui usufono mamalu, e lelei ona see ese ma le mataupu lea, leaga e tele lona afaina, alu alu le suaga o le vaatele, ae tulai mai se faamai i totonu o le atunuu, e fesili o ai e fesili i ai? E tuuai le Malo.

O le mea la lea, malie le sui usufono, tulai mai e faaauau lau lauga, ae see ese ma le lauga, ma le faaaloalo lava.

Afioga AFOA AMITUANAI FALEULU MAULI: Faafetai i lau Afioga i le Fono, faamalulu atu i lau Afioga i le Minisita, o faamatalaga lea ou te fai atu, e le o ni faamatalaga pepelo, o faamatalaga moni. O lo o i ai foi ma evidence i i.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai...

SUI FOFOGA FETALAI: Saunoa mai le Taitai o le Malo.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: E i ai le atunuu lea e fia faasao, o le atunuu lea o Brazil. Na ia taofia ia tulaga o puipuiga, ma tetee i le tulaga o lapataiga a fomai, o le puipuiga o le latou atunuu. O Brazil la lea e pito nei ia Amerika i le toatele o tagata e maliliu ma tagata mamai.

Ou te manatu ai o lea ua taoto ia lau fautuaga ma le faatonuga i le sui usufono, e see ese i nisi mataupu ona e fai si e tele lava ia le matuia o ana faaaliga ia e fai nei. Ma e afai e le usitaia, ia ona faagasolo lea e tatau loa ona tatou agai i isi sui usufono ia e le i saunoa.

SUI FOFOGA FETALAI: Faafetai i le saunoaga i le Taitai o le Malo. Lau Afioga i le sui usufono mamalu, Palauli i Sisifo, e na ona ou toe faamanatu atu ia le vaega lea, e ao ona silafia e le sui usufono mamalu. Ua maea ona faataatia i le Laulauafono lenei, le poloaiga mo faalavelave e tutupu faafuasei, ma ua maea foi ona ave i ai le Maliega a le Ao Mamalu O Le Malo, ina ia faamamalu tulaga uma ia. E afua ai ona ou avatu le fautuaga, e lelei ona e see ese mai le tulaga lea e te agai i ai. Afai e te le usitaia, ona agai lea o le Nofoa i nisi tulaga e pei ona masani ai le Fono i ona Taulumaga.

Ou te fautuaina ia le sui usufono mamalu, see ese ma le mataupu lea. Ua maea ona ave i ai le Maliega, faaoga masks ma mea uma e puipui ai le mamalu o le atunuu. O lou lava lea finagalo na o oe. Ae faaauau le lauga, toe 2 au minute.

Afioga AFOA AMITUANAI FALEULU MAULI: Faafetai, sa i ai lou talitonuga e i ai se taimi ou oo atu lea e vaai ia lo tatou Palemia, e fia talatalanoa o lo o ia te au ia the remedy for the cure o le faafitauli lea e aoga ai, atonu e...

SUI FOFOGA FETALAI: Ua ou toe soso atu ma le faaaloalo i le sui usufono mamalu, afai e te le usitaia le poloaiga ua uma ona tuu atu e le Nofoa, ae lelei ona e see ese pe afai o i ai nisi mataupu o totoe. O lea ua uma ona ou faamanino atu, tulaga aiao tetele, ua taoto ai le atunuu lenei.

Afioga AFOA AMITUANAI FALEULU MAULI: Ia faafetai o le a ou see ese ma le mataupu lea. Faafetai o le a ou talanoa i le Tala o le Tupe, e

faamalo lava i lau Afioga i le Minisita e manaia ia le tatou Tala i le Tupe. Vaai o lo o i ai ia le fesoasoani tele a le NPF e \$33 miliona e faasafua atu i members and all that. Ou te talitonu o lo o i ai tagata o le tatou atunuu e manaomia ia le fesoasoani mai le NPF i nonogatupe. Ia o le taimi lenei, e tataua ona ave le avanoa i o tatou tagata o lo o fia faatino ia ni o latou atinae, e nono mai i le NPF. Ma o le taimi lenei, e leai se mea e mafai vagana ua e alu atu i au contributions ae o se tulaga foi lea o ni nonogatupe e fai ni atinae pe fai se faatoaga pe faalelei ia lou faleoloa ma mea faapena, e le o i ai se fesoasoani a le NPF i le mea lea.

O lea ou te matau i le tulaga lea e i ai i le taimi lenei, ua na o tagata ese o tagata foi ia mai fafo, e ave i ai ia tatou tupe tetele. \$5.5 miliona lea na ave i le isi faipisini Asia. Ia e faigofie lava i tagata ia e omai maua ia latou fesoasoani mai le NPF. Ae sa tataua ona consider foi ma nai o tatou tagata e pei o Palemene...

Afioga Hon Sili Epa Tuioti: Lau Afioga i le Fofoga Fetalai...

SUI FOFOGA FETALAI: Tulai mai le Minisita o Tupe.

Afioga Hon Sili Epa Tuioti: Malie le sui usufono, ia e fia faasao. O le \$35 miliona lea e lavea i totonu o le faamama avega, e patino lava mo i latou o fai saofaga i le NPF. E ese mai latou o lo o fai ia latou nonogatupe i le NPF. O Saofaga ia, ia o la ua maua ia le dividend e nao latou lava e i ai saofaga ia o le a faasoa atu i ai ia le \$35 miliona. O isi a tatou fesoasoani ia o lea e galulue faatasi ai le Faletupe o commercial banks, o lea e fesoasoani ai le Malo e totogi ia tului 2% mo tai 3 masina, e fiafia e fesoasoani ai latou e faia ia latou nonogatupe faapisinisi ia faapea tupe a aiga.

Ia faapena foi i le isi tatou lala foi lea o SPBD, lea e i ai ia tamaitai e faapena foi ona fesoasoani i ai. Ia sa i ai foi ia se sui sa talanoa mai, po o le a le mea e le avatu ai se faamama avega i Finance Company. Masalo po o le tatou Fonotaga i le tausaga lea na tea nei, sa faatonuina foi ia le Kovana ma le Central Bank, ona o le tulaga foi lea i le taimi lenei, ia e le o regulate ina ia Finance Company, ma o lea ua logo mai foi au e le Central Bank, masalo po o le oo atu ia Tesema ua taatia mai le draft o le Tulafono, e mafai ona regulate ia Finance Company, e regulate ai ma faatonutonu ai le tului, ia ma teugatupe. Ao le mataupu na e laga, ia o le \$35 miliona, o le tupe lava lena e faasoa e le NPF, o le dividend i ai latou o lo o fai ia latou saofaga. O le faafetai lea.

SUI FOFOGA FETALAI: Ia tulai mai le sui usufono ua maea lou taimi faauma mai lau lauga.

Afioga AFOA AMITUANAI FALEULU MAULI: Faafetai i le faamalamalama a le Afioga i le Minisita, e malamalama lelei lava le tupe lea ae peiseai na ou talosaga ina ia ave le avanoa i o tatou tagata, e maua ai foi ia ni a latou nonogatupe e ese mai i mea ia. O nonogatupe e pei ona fai o le tatou NPF, i isi mau tagata tupe tetele ia, e tatau foi la ona maua se avanoa o tagata e fai ai ia ni a latou loan mo a latou atinae.

Ia pe le toe sau se isi e sui usufono, pe retire ia tatou CEOs ae o la e i ai ia se avanoa faapena i le tatou NPF, e tatau ona maua ai ni a latou fesoasoani i mea na, e pei o le tulaga lena.

SUI FOFOGA FETALAI: Ia faafetai.

Afioga Hon Sili Epa Tuioti: Lau Afioga i le Fofoga Fetalai, e moni lava latou e le o taofia ia faipisinisi ma o tatou tagata e o atu e fai talosaga i NPF ia mafai ona faia ni nonogatupe. O lo o maua avanoa ia e pei foi o nonogatupe la e fai i commercial Banks, ia e i ai tulaga foi ia e avatu ia le proposal, ia e avatu ia ni fanua po o ni aseta e guarantee ai ia le nonogatupe. O lona uiga, e le o taofiofia, e fua lava e le NPF i le lelei o talosaga, ina ia mafai ona toe totogi ia le aitalafu lau Afioga i le Fofoga Fetalai.

SUI FOFOGA FETALAI: Faafetai a lailoa lau Afioga, malie le sui usufono mamalu ua maea lou taimi.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, ou te tulai ma le faaaloalo lava, o le taua foi o le finagalo o le sui usufono. O lea faatoa oo i mea aanoa i le Tala o le Tupe e avatu ai se manatu pe le mafai ona faaopoopo se 2 minute e talanoa ai le sui usufono, o le sui usufono o le qualified accountant a lo tatou atunuu o lea faatoa oo tonu lava i le mea e tatau ona amata ai lana lauga.

SUI FOFOGA FETALAI: Ia malie le sui usufono mamalu o lea e faatu mai le lafo, ua maea le taimi o talanoa i isi mea ae o mea ia sa tatau ona talanoa i ai. O le mea lea ou te le talia ia le lafo faatu, ua maea le taimi ma ua ou faaaogaina foi ia le Vaega o le Tulafono Tumau 92 e faamaea ai lau lauga. Malie le sui usufono mamalu, ua maea lou taimi.

Ou te tapa lau Afioga i lem Sui Taitaifono.

Afioga Hon FAUMUINA TIATIA FAAOLATANE LIUGA (Palauli le Falefa): Faafetai i lau Afioga i le Fofoga Fetalai, i le avanoa ua tuuina mai, e fai ai foi se sao aua le Tala Faatatau Autu o le Tupe mo le tausaga e amataina i le 2020.

Faafetai i le Atua, ua aumai lo outou soifua ma so matou ola, i lenei itula o le, afiafi. Faafetai i le avanoa ua toe maua, e fai ai se manatu aua Samoa o

lo o tapuai. Manaia ia o le faamalosi a nisi o sui usufono, fai mai e tatau ona tatou faaaloalo i le Atua. Ia e faapena foi ona favour tatou e lem Atua.

O se tasi foi o sui usufono sa saunoa, e faapea e leai se mea fou i lalo o le la. O le tala lea a Solomona. Ae fai mai Paulo, o se ua ia Keriso o le tagata fou ia, mavae mea tuai, faauta ua faafouina mea uma. E na o le tagata lava i le Atua, o le tagata fou. Ou te talitonu foi, o lenei Palemene, ou te iloa o tagata fou uma, tulou lou gutu ma le afi. Saunoa foi nisi o sui usufono, 'afai e le atinae e Ieova le fale, e galulue fua o e atinae'. Na fai mai ai lea o le isi tala fai mai 'o le fanau, o le tauai mai le Atua', ae o le u fanafana foi e uu i le lima o le toa'.

Lau Afioga i le Palemia ma le mamalu o le Palemene, o lea e uu i outou aao ma ou lima le u lea tatou taumafai ina ia manuia Samoa. Ma o lou taofi foi, afai tatou te talitonu i le Atua e faapena foi ona alu e sao lava le u. O lona uiga e tatau ona tu le u i le mea foi lea e tau e le au velovelu, o le bulls eye pe afai tatou pei o le sini po o le manulauti o lenei tala o le tupe lea e faapea mai tatou, taumafai e lalaga faatasi le lumanai. A o lau faauigaina o le saunoaga autu lea a le Afioga a le Minisita o Tupe, afai ua faamanuia le Atua ia te oe ma au ma tatou uma, ia avea i tatou ma faamanuiaga mo Samoa. Le Palemene, ia avea tatou ma faamanuiaga mo lo tatou atunuu, ae e mafai ona manuia Samoa pe afai ua faamanuia le Atua ia te oe ma au. Fai mai le tala a le Fai Salamo, "Ua faauuina lou ulu i le suauu, ua taumasuasua lau ipu." O sui usufono uma lava lea e i totonu o le Maota lenei, e tatau ona osooso le ipu, ina ia manuia tagata ona o lou soifua tautua. Samoa o lo o faafofoga mai, e ala ona taua le auaunaga lea e fai atu i totonu o le Palemene leaga e aoga, ia uma atu tatou a o la e foi ua faapea outou alo ma ni a matou fanau, o lo o ua taoto mai tiasa i latou na faia le aso lenei. Saunoa le isi sui usufono o le aso ananafi e aoao mai e galue ai le aso nei, a o le aso lenei e faufau ai taeao.

Lau Afioga i le Fofoga Fetalai, faamalo le tautai. E le o afio mai Leaupepe ae avatu i ai le faamalo. Faafetai i le faatautaiga o le tatou Palemene.

Tuilaepa, le Afioga i le Palemia, o le Sui Palemia ma le Kapeneta, faamalo le galulue, faamalo le tautua, faamalo le auaunaga i le atunuu, malo le galue e le o faatamala la outou auaunaga. O se fiafiaga i o matou lo o to matou vaavaai atu i le tausagi a tagata ua oo le vai, ua oo le eletise ua tofu tamaiti ma teineiti ma telefoni. O uiga ia e atagia ai le loloto o le tofa ma le alofa e faavae ai galuega fai a si o tatou atunuu.

Faafetai. Ou te iloa e sili ona avatu muamua lava lau faafetai i galuega a si ou itumalo. Papalii, faafetai mo le auala galue. O le auala galue lea, a faaauau tele i uta, e tau atu i le mea lea na taua e isi auvaega lea sa nofo ai le tama lea o Taemanutavae. Ou te iloa la e le gata o le auala galue, a o le auala e oo i le mataaga. O le matou nuu foi lea o Sili, na pau lava lea o le nuu i Samoa nei e tautatala laau lea e tau ai le mea e tau o le faugagana, ae e te le mafai ona e malamalama i ai pe afai e le o oe o se tagata Palauli le Falefa. Na o

matou lava e malamalama i le gagana a laau ia. Ma o le mea lea ou te tatalo atu ai Papalii, faaauau le ta auala se i tau i le fau lea.

O le vaipaipa foi o si ou itumalo i lou nuu o Gataivai, o lea ua atoa le 5 tausaga o faaauau, faafetai. Ia ona o le faigata lava o le faasoasoina o tupe, ae ua lata ina maea lea galuega. O le vaipaipa tumaoti foi ou te iloa o lea e faafofoga mai le Afioga i le Minisita mo Tina ma Tamaitai ma Agafesootai.

O le vaipaipa lea toeitiiti lava uma si ou nuu o Sili, faapena foi Papa ma Puleia e faaauau ai le galuega lea. E i ai le galuega fou lea i le tamai auala e le o se auala tele, e le i faia lava se galuega i si nuu lea o Papa ma Puleia, o se auala galue i le faaiuga o lenei tausaga po o le amataga o le tausaga fou. Ae i ai nai auala na o aualatetele o le Malo, o lena ua e silasila i ai ua matua faaleagaina lava i le va o Vaiala i Gautavai ma le aai tuai o Sili se i e silasila ane i ai. O le auala foi i le sootaga i le alu atu i Puleia e tau i Gautavai uta, o lena e pei ona faataatia atu. O manaoga na o si ou itumalo.

O le Tala o Tupe ou te lagolagoina. Ou te iloa pe sa taitai lau Afioga i le Minisita o Tupe e le agaga paia. O au e tele ina ou laga mea ia o tupe totoe. O le tausaga muamua lava o le tatou Paeaiga, totoe le \$101 miliona, tausaga lea na sosoo ai 2017/2018, totoe le \$31 miliona. Tausaga lea na uma atu nei, o tupe ia ou te tau atua ua uma ona sue. E \$48 miliona. Tausaga lea o le a uma i le vaiaso lea o le a sau nei, e totoe foi tupe, ou te iloa foi pe ova i le \$10 miliona. O lona uiga, o lea na silafia lelei e oe Sili e i ai le mea e manaomia ai tupe nei. Sa ou sainia i le vaiaso nei le joint statement a le ACB, European Union Joint Presidence e confer ai i atunuu uma lava o le ACB le tulaga o le faataatiaga o latou aisiga ma mea uma faapena i World Banks, IMF ma le Development Banks ma isi atunuu, o a latou paaga e fesoasoani ai. Lea foi e reflect lelei lava i totonu o le paketi lea a tatou. Lau Afioga i le Minisita, faamalo. O le tulaga lena e pei ona i ai.

I le faataatiaga mai o le tatou Tala o le Tupe, a silasila le Palemene i tupe faaalu faauletulafono, ua palasi i le \$10 miliona. Aisea? Ua ositaulaga le Palemene ua le faaauaua ai le siitaga o totogi o lenei Palemene ma tofi taualoa. Aisea? Le tapuaiga a Samoa. O le isi vaega o le pau lea, ua pau foi i lalo tupe e totogi atu i tatou aitalafu i fafo. Ma e faaauau lava le mea lea i lau vaavaai atu i le pattern lea e sau ai le mea lea, o le fesoasoani mai o faletupe po o a tatou paaga i le tatou tamaoiga. Ma ou te faafetai atu ai i lau Afioga i le Minisita mo le tofamamao.

Ona ou oo mai lea i si au uo faapelepele lea i le Matagaluega o Aoga. Loau, e 3 tausaga lea sa ou avatu ai lava le lui ia te oe i mea nei o tamaiti ua le faaauauina aoga. Ae ou te faafetai atu i lau Afioga, le Minisita Lagolago ma le Ofisa Sili o Pulega o Aoga ma le Matagaluega, o lea ua aumai le \$6 miliona e fai ai le polokalame lea e mafai ai ona fai le polokalame fou ia mafai ai ona toe faaaoga nei tamaiti. Faafetai tele lava. Ae pau le mea lea ou te vaai atu e le consistent, leaga o tamaiti nei, e tele ina fiafia e o i taaloga. Sa tatau foi ona aumai se isi \$4 miliona po o se \$5 miliona e fai ai malae

taalo, aua afai o le a aoao tamaiti i le vaega lea i galuega e faaaoga ai o latou tomai, physical bodies, lona uiga, e manaomia taaloga. E tatau foi la a o lea na o le \$150,000 lea e aumai e fai ai malae taalo. O lona uiga e le consistent. E tou te silafia lelei o Sili e le o se tagata taalo, o le tagata savali, a o lea o le a lua faalagolago i ai ma Alaiasa, a o Mulipola na o le tapolo lava e fiafia i ai, a o mea o malae lakapi, malae kirikiti ma malae soka. E ala ona ou naunau i le vaega lea Loau, leaga o le tele o tama o le Manu Samoa e omai mai Palauli le Falefa. O Gataivai, Sili, o Gautavai, Puleia, o Papa, e omai ai le au. Ia o le au kirikiti foi a matou, e tele ina siamupini. E omai iinei taaalo o ma le fusi, o i Tutuila taaalo o ma le fusi, o tagata taaalo. O le mea lea, fai se malae taalo mo si ou itumalo aua leaga o i lea e omai ai tama o le Manu Samoa. Ae faafetai atu, malo Faimalo ma le Matagaluega. Ua tele tala. E i ai taimi a ou tilotilo atu ai i le tatou Matagaluega ma lau Afioga ma le Minisita Lagolago, e maligi ou loimata, e le o se upu e avane ai, malo le galue. Faamanuia le Atua ia te oe ma le Matagaluega ma le aufaigaluega. O lea e fai mai e leai se fofu o le Koviti-19, a o la e fai mai le Isaia e 53, "O ou faalavalava ua matou malolo ai." O le a se isi vailaau tou te mana'o ai? A sausuina outou i le toto o le tamai mamoe, e le mafai ona aafia outou i se mai. Ae pau lava le mea e ala ai ona le mafai ona faamalolo tatou, ona ua tatou agasala.

Na avatu le isi mai ia Iesu e faamalolo tuutuu mai i luga, fai atu i ai Iesu, ua faamagaloina au agasala. Ae fai mai le au faifeau, oi, faapea nei e aumai faamalolo. O ai oe e te faamagaloina au agasala? Fai atu Iesu, faamagaloina au agasala ma e malolo. Alu ua e malolo. Afai la e le o sausuina oe i le toto o le tamai mamoe, e te lavea i le Koviti-19. Ae faafetai tele lava i falemai itumalo, oka se faamama avega mo si o tatou atunuu. Faafetai o lea o le a ave fomaini, o le a fai foi fale lea e aumai ai le tupe e fai ai fale o alii fomaini ma tamaitai tausimai mo falemai itumalo. Faafetai o le a mafai foi ona avatu ai ma ni vailaau i totonu o nei falemai, aua e ala ona le aveia i ai ni vailaau ona e le o i ai se fomaini ne i sese ona prescribe vailaau.

Lau Afioga i le Minisita mo le Soifua Maloloina, o le isi mea lea ou te faalogo i ai i mea o komiti tumama, e manaia foi ae aumai ni a latou sui i totonu o falemai itumalo, aua o le matou falemai mo le faataitaiga, o Satupaitea, Palauli le Falefa ma Palauli. O lona uiga, e na o le 10 nuu po o le 11 nuu lea e i ai. Ua lava a le komiti lena e aumai i totonu o le falemai e tai 2 a sao o le vaiaso pe tai-1 aso o le vaiaso ona o atu lea brief komiti tumama a afioaga taitasi. Tasi lena faaaogaina.

Lau Afioga i le Minisita mo Faatoaga, sa ou faapea e tele se... aua o lea o le a tatou o e amata ona fau oloa e sui ai oloa ia e aumai fafo, e pei o le faaiuga a le Kapeneta e faaaoga ai le SROS e amata ai ona fausia oloa e tai pei o le uisiki, o le falaoamata ma isi. Ae manaia pe a amata ona tatou tua lava tatou i a tatou mea e fai ina ia tuu ai i lalo le tulaga o le tatou faalagolago i oloa e auina mai fafo, e amata ai ona faaititia le faaaogaina o le tatou tupe

teu faavaitaimi i fafo. I le faafiafiaina lava foi o lou sui usufono, ona o le tupe lea o le foreign reserve lea e i ai nei lea toetiiti \$600 miliona, e toetiiti lava 8 masina e mafai ona faalagolago i ai oka o oloa e auina mai i le atunuu. Ae ou te iloa foi o lea o le a amata ona fesoasoani, o le mea lea lau Afioga i le Minisita o Faatoaga, afai o le a fai le gaosiga o mea ia, o lou itumalo le itumalo e organic, aemaise lava lou nuu lea o Sili, o i ina e tatau ona aumai ai le talo e fai ai le uisiki, aua e leai leai ma se vailaau e faaaogaina. O le mea lea e tatau ai ona fai ina ia matua alumia, taugofie ma maua ai foi galuega a o tatou tagata. Tasi lea vaega o le a replace ai le tatou galuega a tagata, aemaise le vaega lea o faletalimalo, o faatoaga. Aua afai e fai faatoaga e galulue uma ai lava le aiga, galulue ai foi le afioaga ina ia taumafai e faateleina a tatou fua o faatoaga, e le gata la mo le tatou lava soifuaga iinei, ae faapena foi i le tulaga o a tatou oloa e auina atu i fafo.

Tialavea faafetai, na ou tuu atu le lui ia te oe e te sueina le \$550 miliona o tupe. Na e ausia le vaega lena i le 2019, na ova mamao ai lau aoina i le \$30 miliona. Faafetai, malo le toa. Talu ai le koviti ma le misela, o lea o le a toe foi ai le tatou tupe maua i le tulaga sa tatou omai ai i le 2016. Na o le \$50+ miliona lea e pau ai, ae faamalo le galulue, e le faigofie, o le faigata e matautia. Na ou alofa lava ia oe ina ua ou vaai atu ua amata ona e le toe alu atu e te tapolo ua le mafai ona e toe alu atu e te koloni, taumafai e malolo ma nofo i le fale. Oi o lea ua faamanatu mai e le vaega lea ua leai sou maota. Ia se i fai se tatou fundraising e fai ai le tatou fale.

Faafetai i le Matagaluega o Faamasinoga, lea o le a faatino ai le siitia o le tatou ofisa mai Tuasivi i Salelologa. I le palota o le 2011 na fai ai le tala a le isi Vaega Faaupufai fai mai ua o le Malo fau le maketi i le togavao. O lea la o le a 10 tausaga i le palota lea o le a sau nei, ae o atu e le se togavao le mea le la, o le taulaga le mea le la, o la e ua 2 pamu penisini, o la e ua i ai le NPF, o lea o le a i ai leoleo, o lea o le a i ai le Ofisa o Faamasinoga, o le matua tele lava. E le o se togavao. Ia ma o lea ua Minisita Sili, ua atili ai ona lelei le taulaga. Aua o lea ua fai mai le isi aualii le la, ua tele i oloa o suka ma mea na la e faatau i le maketi. Tasi lena mea e te iloa ai le popoto o tagata Savaii, e avatu i ai le maketi ae o fai a latou tamai fale foi nei i luga o le aualatele, e leai se tupe e alu ai, ae ese lava foi mafaufauga o si o matou motu, e potu e ola.

Ona oo mai lea... sa i ai se tasi o sui usufono sa saunoa i le faatauina o le tatou SamoaTel. E ala ona ou taua le vaega lea ona e taua le vaega lea sa saunoa i ai nisi o sui usufono faapea na gau le faatauina o le SamoaTel. O mea nei o oloa, e fua lava le value o le oloa i le taimi e toe faatau ai. Ia ma o le principle foi o nei mea o fefaatauaiga, o le mea e malie i ai le tagata e ona le oloa ma le mea e manao ai le tagata e faatauina le oloa. E pei la o le mea lea ou te fia talanoa ai, leaga o in a fanau ai le faaputugatupe teu faafaigaluega o mavaega tausi a Samoa. O le mea lea ua tupu nei, ua avea le UTOS aua e 20% lea e own ai e le UTOS le BlueSky, o lea foi la ua alu i

luga le value o le Vodafone lea e 25% e own ai e tagata Samoa. O le mea lava lea ou te naunau ai lava ma ou pulunaunau atu, tautuana e aveese le dividend lea e totogi e nei tagata, o nai a latou tupe teu. Talofa i le loomatua la e faapau le koko, la e valu le popo o le lolo, la e alu e toto le maumaga, la e alu e fagota ae aumai toe fai le dividend, ae le o se tupe mama, o le tupe lea e avatu i saofaga lea e faagaioi ona avatu lea fai mai le kamupani o pulega, o le latou tupe. E le o se latou tupe, o le tupe a tagata ia. Sili, ma Lautafi, aua le toe faia lea mea o le dividend, toe faafoi le tupe i nai tagata.

Vaai i le faapau koko lale e i luma ae o le fale o Patele ma le fale o Eveni, le faatau ia lale e fai nai ana tau ia pe 5 pe 10, le maketi la le faatau ai niu a e pau e matua e tigaina. Faafoi le tupe i lima o tagata. Ia o lenei foi UTOS, o lea ua fesoasoani, o la e ua fai e le vaega lea, le mea la lea la e fiafia ai nai toeaia ma loomatutua ma nai talavou ma taulelea ma le malosi lea e i ai i i, ua 3,200 members.

O le naunautaiga lea e i ai lau Afioga i le Palemia ma le Kapeneta, ia maua le 20,000. A 20,000 sui o le vaega lea e finance uma lava e le UTOS a tatou atinae. La le ua fau le fale o le maota o Samoa la e i Aukilani. O le a? O saofaga a le UTOS. O lea ua faalelei le fale o le Hai Komisi i Ueligitone. O le tupe a ai? O tupe a latou nei. O le tele o le mea lea ua i ai, o le aoga lena. O le mea tonu lena na ala ai ona fai e le tatou Malo le UTOS po o le teugatupe o mavaega tausii a Samoa ina ia mafai e le tagata limavaivai ona faatau ni ona sea i kamupani po o kamupani a le Malo ua faamatuu atu, ua manuia tagata e toatele. Faafetai i lenei faatofalaiga ua le mafai ai, aua o mea ia. Ia o lea foi ua ave le \$30 miliona e fesoasoani ai i le tatou Samoa Airways po o le Polenisia. O le net worth lea ua i ai o le UTOS, toetiiti lava \$200 miliona. Na ou mafaufau lava e oo i le \$300 miliona i le tausaga lea na tea atu nei, ae leai se mea o i ai o lo o i lima o le Board of Directors o le matua laua o laua tamalii o le atunuu o lo o i ai. Ou tea vatu foi le faamalo i le komiti faafoe lea faapea foi le kamupani o pulega. Tou te silafia na o le 12 tagata o le kamupani lea a o le tele o le tupe lea e maua mai ai ma fesoasoani i atinae a le tatou Malo. Ou te faafetai atu ai i lau Afioga i le Palemia, le Kapeneta ma lenei Palemene mo faaiuga fai.

Sa ou alu i le asiasiga a le CDC matou o ai le Komiti o Tupe Maua, sa ou vaai ai i le malae vaalele lea e i Tiavea, o le matua manaia.

SUI FOFOGA FETALAI: Malie le sui usufono o lo o saunoa se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, a o le i see ese le afioga i le sui usufono mai le mataupu lea, ou te talitonu o le mataupu tonu lea e fitoi i le Minisita o Tupe ona e tele le galuega sa faatino e le Ministry i le taimi lea pei ona saunoa le alii faipule sa Minisita

foi o Tupe, e malamalama i le faavae o le teugatupe lenei, ae na afua mai i le faaiuga lea a le tatou Malo mo le faamatuu atu o le tatou SamoaTel. Masalo la o se taimi ona saunoa ai lea o le Minisita o Tupe pe a oo ina faasolo mai saunoaga i le itu lenei e tali atu i le tele foi o mataupu sa laga e le tatou Maota nei. Ae taua tele le vaega lea ua tagofia e le Afioga i le sui usufono, e malamalama lelei i ai, ma e le taumate foi o le a tele se isi faamalamalama pe a oo i le matou taimi. A o le itu taua lava lea e i i pei ona taua e le sui usufono, o le taofiga lea o se vaega tele o le sea o le kamupani lenei i le taimi sa mulimulitai ai le Malo e faatino le policy lea po o le vaaimamao ina ia faamatuu atu lisi o kamupani a le tatou Malo mai le Malo ina ia faagaoioi e tagata o i ai le poto faapitoa ina ia le 10% le tupe e toe maua mai, a ia 200% e toe maua mai i le faaaogaina o le poto masani e le o i ai i o tatou tagata i le taimi lea, aemaise foi o le faalauteleina atu lea i tua i le atunuu e faitau miliona ma miliona tupe sa latou toe fausia ai le infrastructure e toso atu ai i tua le tautua lenei. Ma o se taimi muamua lea ua faatino ai e le Malo le faiga lea ina ia faatu se teugatupe e mafai ona saofaga i ai lo tatou atunuu ia i latou, tagata uma o le tatou atunuu e mafai ona teu ai seleni i i ma faagaoioi ae mafai ona faapea o lea e lava le umia e o tatou tagata sea i se faalapotopotoga tele faapea. E le na o le tatou Malo ua faia mea ia, e fai uma lava e Malo i le tulaga lea o le faasee ese mai nisi o kamupani o lo o aafia ai le Malo i le tuu atu ia i latou e tele lo latou poto masani. E i ai la se taimi o le a saunoa ai le Minisita i le tulaga lea. Ma o le iuga na fai e le Malo, o lea ou te taumate o Mati i le 2011, ina ua uma ona faasalalau ma manumalo ai la le kamupani lea o le BlueSky, e tele a latou lala i le lalolagi atoa e alu atu i Amerika ma Europa, kamupani tetele ia, e tele lo latou malamalama, e tele lo latou sootaga i atunuu i fafo. A o le taua o lea ua faamaalo iuofe e le Afioga i le sui usufono o le foi sa Minisita o Tupe i lene taimi le faatinoga o mataupu nei. Ou te manatu o le a toe faalautele atu e le Minisita o Tupe i le taimi e tali ai matou. O le tele o mea nei, e fai lava si loloto, a vaai i ai le tagata e le malamalama i ai, e vaai na o le tumutumu ae le mafai ona oo i lalo i le loloto. O lea la ua amata, lea ua fanau mai ai, ia isi avanoa mo tatou tagata lautele e teu faafaigaluega ai latou tupe, aemaise foi o ekalesia. O isi na o i latou o lea e tetele a latou teugatupe i i, ona e tetele a latou tufatufaga e maua mai ai, na i lo le ave e teu i le faletupe. Lau Afioga i le Fofoga Fetalai, o le toe fesoasoani atu lene, ne i see ese le sui usufono. O le isi itu taua, ona ua agiga soo le tulaga lea i le tapenaina o le Tala o le tupe. E i ai lava ia le tulaga e ono maua ai tupe faasao i le faaiuga. E mafua i se a? I le tapenaina o le Tala o le tupe, e fua tonu lava ia le tulaga o le tupe faatatau i fuafuaga o atinae, ua uma ona faatalanoa ma Ofisa sili o Pulega o Matagaluega, o mea e tataua ona fai i le tausaga. O le vaai mamao lene, ae manatua lau Afioga i le Fofoga Fetalai, e le iloa e tatou le mea e tupu i le lumanai. Pe oso se matagi, pe oso se afa, ona taofia ai lea o galuega. O taimi uma e taofia ai, o lea e alu i luga le tau. E alu i luga le

tau, ae i ai foi ma vaega ua le mafai ai ona faatino le galuega ona o uiga ia. O lea sa faamaalo iuofe, e 3 a tatou poloketi e tatau ona faatino. E tatau ona faatino ia Mati, ae o lea ua oo ia Iuni e le i faatinoa lava, aisea? O le Koviti, ua le mafai ai ona o mai latou i fafo e fai galuega ia. O le ala lena, e i ai pea faalavelave e tutupu mai, aemaise o le fuafua o galuega o le a faatino ae faalava o tatou tagata e finau i fanua. O le isi mataupu tele lena, o lea e ala ai ona le mafai ona atoatoa le galuega e oo atu ai i le faaiuga o le tausaga o la lava e totoe tupe. A o le taimi e faataoto ai le Tala o le tupe, e vaai lava Matagaluega uma lava i mea e tatau ona fai, pe a faapea e leai se faalavelave. O le tulaga masani i taimi e fuafua ai tupe, e ova ma le piliona. E tai oo atu lava i le 2 piliona fuafuaga a Matagaluega. Manatua lelei o Matagaluega, o la e faauluulu e tagata atamamai, ma lalo ifo o la e lagolago e tagata atamamai uma ua foi mai fafo, sa aoga i Iunivesite. E le faapea e faatamala le tapenaga, o mea nei o Tala o le tupe. Ae mafua ona i ai tupe faasao o le faaiuga, ona o faalavelave ia, tatou te le taumasina tatou te le iloa mea e tutupu i le lumanai, ona tulai mai ai loa lea o tupe faasao ia.

Lau Afioga i le Fofoga Fetalai, ua agiga i totonu o le Maota mea ia, ma e tatau ona faamalamalama. Ma o le tulaga lena, e le tatau ona i ai se tupe e faasao pe a faapea, e faatino a tatou galuega ae leai se faalavelave. Po o se faalavelave e afua mai i le tala o le tau, ua faaletonu, po o le faalavelave e afua mai i le tuai o tagata e tusia ata, inisinia po o tagata e le maua i inei, ae maua i fafo. Po o faalavelave e afua mai i le mea lea o le tulaga o le faalavelave o tatou tagata pe a oo ina aafia fanua. E oo foi i le mea lea na tulai mai o i le fausia o le malae vaalele i Tiavea. Ua uma ona faataoto uma mea uma, ae o atu latou nei i Apia ma faalavelave, na mafua ai ona tuai, tuai ona faatino. Ma o le mea lena, e le mafai ona tatou taofia. A tulai mai lava faalavelave, e pau lava le mea o le taumafai e fofo, ona faatino lea o mea e mafai. O le ala lena e mafua ai, ona o atu i le faaiuga o le tausaga o lo o i ai pea seleni o totoe. A o nisi foi tausaga e oo atu i le faaiuga, ua leai se mea, ua toe manaomia tupe e tatau ona toe faatatauina, o le mafuaga e ala ai ona fai pea, a tatou Tala Faaopoopo o le tupe. Lau Afioga i le Fofoga Fetalai, o si vaipanoa lea, e tatau ona faamalamalama. Ona o lea e agiga, ae leai se faamatalaga e le i oo i le taimi e talanoa atu ai matou, o la e faafogafoga mai le atunuu. O ia o lena e totoe le \$10 miliona... le a la le mea mea na le avane ai e fai le mea lea. A o le tulaga lena lau afioga i le Fofoga Fetalai, e i ai faalavelave tutupu e le mailoa e tatou, e na o le Atua na te silafia le mea e tupu i le 12 masina i le lumanai. O le fesoasoani atu lena e faamalamalama le vailiu lea, ona o lea e fealuai pea a tatou upu i luga o tupe totoe i le faaiuga o le tausaga. E i ai le taimi e sau ai ua tele, e i ai le taimi e sau ai ua laititi. Ae i ai foi le taimi e sau ai ua leai.

Lau Afioga i le Fofoga Fetalai, o le mea lena sa ou tulai atu e faamalamalama.

SUI FOFOGA FETALAI: Malo saunoa i lau Afioga i le Palemia, ou te manatu foi ua faafofoga sui usufono e pei ona taua i lana lauga, e lelei loa ona faasee i nisi vaega.... Saunoa le Minisita o Pisinisi Alamanuia ma Leipa.

Afioga Hon Lautafi Fio Selafi Purcell: Faafetai i lau Afioga i le Fofoga Fetalai, faafetai foi i le sui mamalu mo saunoaga matagofie. E na ona ou tu atu lava e faasao si vala laititi lea ona o lea na agiga i le saunoaga a le sui mamalu. Faapea o lea o le a aumai le \$30 miliona a le UTOS, e ave ma le Samoa Air Ways, ona o lea e faafofoga le atunuu. O le manatu lena sa i ai. A o le nonogatupe, a faafofoga tagata ai faapea o se tupe meaalofa a le UTOS. O le nonogatupe e toe totogi a le Kamupani vaalele. A o le mafuaaga muamua lena, o le manatu lena, peitai ane ua toe fetuunai, e na o le \$15 miliona le nonogatupe lea ua faatagaina. Mo le faasaoina o le saunoaga, ma le faaaloalo lau Afioga.

SUI FOFOGA FETALAI: Ou te manatu foi o le sui usufono ua leva i le Palemene, e faigofie ona manino mea uma. Ae tuu atu le avanoa e faamaea mai ai le saunoaga.

Afioga Hon FAUMUINA TIATIA FAOLATANE LIUGA: E faafetai atu i le Palemia mo le faamalamalama o le vaega lea. O lea ou te malamalama lelei i iai faapena foi i le Minisita. O faamatalaga lava na aumai ia au, ae o lea ua e faasao maia, o le vaega lea e faamalulu atu ai. Ou te le o fai atu e foai atu, e leai o le tupe e nono atu, aua o le UTOS o le tatou Organisation mo o tatou tagata.

O le mataupu mulimuli leaga o lea ua faauma mai lou taimi, o le malaga lea i Tiavea na matou asiasi ai. Matou molimauina le manaia o le malaevaalele. Ou te iloa o le molimau na aumai e 1500m ua i ai, na fai atu ai foi lea o lau tuualalo. Pe a pe a toe faatele atu ina ia mafai ona avea ai foi le malaevaalele i Tiavea, e mafai ona land ai le 737, pe a o i ai ni tupe, a o le taimi lena o la e faaauau, aua e avea ai ma malaevaalele faava o malo e tua i ai vaalele pe a le mafai ona land i Faleolo ona o le tau. O le vaega lena, sa taua foi e se tasi o sui usufono mea ia o overhead bridges. Ana faapea o se mea e fai i private companies latou te faia, ona lisi lea i ai e le Malo, a uma le...po o le 10 tausaga ua paid off le ona toe transfer atu lea o le aseta a le Malo ia, ae mafai ona faasalalau ai latou e aveese ai billboards ia e tuu i autafa i auala ae faaoga ai autafa o le vaega lea, e sell ai le product. E faigofie atu lena, o le mea lena o la e fai e atunuu i fafo. O le faaoga o kamupani ia, latou te fausia mea ia, ae tuu ai a latou business adds mo le agai i luma. Faafetai atu i lau Afioga i le Fofoga Fetalai, avatu lau faamalo ma lau faafetai, avatu foi lau faafetai i si ou itumalo. Malo le tapuai, malo le tatalo, e le gata o le aufaigaluega totofi a le Atua, ae faapena foi tapau e fa

ma faleupolu e fa. Malo le tatalo. E le sili le tai i lo le tapuai. Faafetai i la outou tapuaiga, soifua ma ia manuia.

SUI FOFOGA FETALAI: Malo faafetai, faamalo saunoa i lau susuga i le Taitaifono o le Komiti o tupe. Manino auofala i tulaga uma, o lea foi ua saunoa le taitai o le Maota, faaopoopo foi le Afioga i le Minisita i nisi foi o atugaluga, aua e maua lava e faalele e maua foi e matau. O le agaga o lenei aso, ua faatamalii mea uma ma ua iu matagofie malo faafetai. E talu ai o lea ua tatou oo mai i le taimi o le saunoaga a le Taitaifono o le Komiti o tupe, ua manatu tele le Nofoa, i le leva ona faaaao gagase le Maota, ona i ai lea o le manatu o le laulau, taeao aena, ona amata lea o le lauga ma le folasaga foi a le Afioga i le Taitaifono a le Komiti o tupe, e tusa o le Tala o le tupe e pei ona lauliliuina nei i le Maota i le aso ua mavae e oo mai i lenei afiafi. E talu ai o lea ua taunuu mai i le taimi malolo o le tatou galuega e tusa o le lafo sa faamaonia. E momoli atu ai le faafetai ma le faamalo i le paia maualuga o le Maota, i lo outou onosai ma le faapalepale foi aua le faatinoina o lo tatou valaauina. E i ai le lagona o le Nofoa, e tala lava o lenei afiafi e faapena aga o felafolafoaiga o le Maota lenei. Tatou te sua lava le aulapauta sua le aulapatai, ae matua lava le tuu i le Atua ma lona finagalo paia. Tatou te o foi e saili ni auro i le aliti o le tai, a o le agaga maualuga ia maua ni ai, aua le tapuaiga a le atunuu. Le paia e o le Maota o a ni faaletonu foi i le taitaiga a le Nofoa i lenei afiafi, e matua atu i ina. E malu le Nofoa, i lo outou finagalo faatupu, malo faafetai saunoa i lenei afiafi, malo le onosai, malo foi le faapalepale. Lau tapuaiga Samoa e le galo, faamalo fai mai o le faiva, tui mai o le mulipapaga, ua iu manuia le alofaiva o le Palemene i lenei afiafi. Ona o lau tapuaiga le leoa. O le a se aga ua sala se pati ua paopapa, i la outou faafofoga faatamalii, o aga a le Palemene. E tetele lava pesega ae matua lava i le oooo. E ui magalo mea uma, i le finagalo o le Atua. Malo le tapuai faafetai tatalo mai, ia manuteleina faigamalologa o lenei afiafi.

Le paia e o le Maota, tatou talosia le agalelei o le Atua i le aso taeao e ave i ai lo outou soifua tatou toe feiloai faaauau le tatou galuega e pei ona atofaina. Ae tatou te le i tolopo, ou te talosagaina le sui mamalu o Falelatai ma Samatau, e faaiuina le tatou Fonotaga i lenei afiafi i se tatalo.

Na tolopo Taulumaga a le Fono Aoao Faitulafono i le itula e 10.55 i le po seia aulia le itula e 9:00 i le taeao o le Aso Faraile, 19 Iuni 2020.